



黃潭浦集卷十七

書

獄中與張煙叔書

張汰沃見幾太蚤令吾血淚無飛迸處古人於仁義爛時自裹血肉今於血肉爛時自裹仁義悠悠命也誰為談者高臺曲池雄疆廣宇似指顧間灰塵上事恨三十餘不追巢許之蹤捧喬松之足耳傳者并云天意已回而梅眼未放魚縣獸檻古今同嗟獄中四十精神不如煙叔一老布衣遠矣破涕加餐千福萬福

羈庫中寄魏秉德書

臨別江渚四顧黯然征鳥厲疾不復縈懷惟送遠將歸問關跋涉增其愁歎耳行後羣奸情露三輔坐敗事可稍申而入都之時攻楊者四起誦經殺蝗動盧牧州之疏而葉潤山又有救章明廷以把持為疑銷金發於典午穿溜積於平時木朽蠹生宜其然也杖後聖明微有悔端而論扉諸臣反唇猶昔前此四月召諸詹翰垂涕錦州之戎四十諸賢無一人發聲而陳并研以阻人啓口為長壽所庇牽連入閣從此當宁確然以為當辜雖睨雪欲消而風霆不改矣九月中有以祿署推倩翁者已啓事而當道又為品級不對停其起艸不審此後當復如何前此蔣八公諸公頗共留心比以資深詹翰將散各部堂及為開府遂抱頭依簷仰面無復饒慮矣楚事敗壞不可言賀李兩將叛為秦賊武陵諉罪於秦蜀閉門誦經不知究竟何似明廷赫然為誅舊督繫新撫慘關內道卒無有善其後遼督又與口相持就餉寧遠而為錦州諸口所斷東西不能相及畿南齊豫之間餓賊盡起旅道不通治平威令獨行於守道精神及犴狴鐵門之內耳倩翁不知何時發

旆想近時別有啓事滑縣亦持重不能真達計此時禹稷亦與顏老同功聞雞擊楫使人心倦也前親友歛贈已屢書力辭而家人持之不審又堆積以累行旅良可畏心今幸抵都而吳郁翁困於艸場盡爲請貸乃知賢者謀慮萬里不爽藉此異日可復反璧知秉德兄能爲親翁綱紀之也

與張玉筍書

玉筍年翁承教又兩月寧遂寂寂耶世事尙可爲天命已有屬年翁以方盛之年膺非常之寄生多事之邦處兩疑之地能乘雲弄鳳翩然高舉者則不俟擇木而栖耳若猶是筍鞭出地未能果自遐逸也顧榮謂張翰曰有當世之望者以自退固爲難弟生海隅又以息陰島外而兵革所徵無遠不屈又近爲輦轂一丘一壑無安枕處是以皇皇若此約與年翁會於江上而方盤石未有共事之意金正希望救甚殷是以決意西行今新安已破事勢愈難弟獨掌隻身無一援者樂毅田單遂爲古今絕物荷蕢石門又恐不免披髮年翁何以教之弟兵不多不能分出四路管仲九合年翁已得一升能以精良濟我夜飯乎履端已屆元始將新咫尺之箋幸蚤自貢是吾兄弟惓惓之懷逾於促膝也江右諸賢藉台翁鼓吹新安諸賢聲勢必合倚杖而聽詔書不獨伯魚開其雙噴也仰望教誨渴於苗雲

答林子篤書

捧書垂念真至拜誅章益重風雨雞鳴之感日市數升米何止丙辰之時今斗米五十錢家廿餘口日需百廿錢雖兩君平垂簾不能望子雲之腹何況帶索枯魚搖木之間乎憶老母在時每道羅一峯客至過午不得飯又云清中陳蓋臣常兩日斷炊以此爲戒不肖常笑以爲戲談今便當真也似此口腹長以累人遂使閔仲孫頭貴於琴瑟聞兄體稍佳爲慰令兒書知霍然良可不孝與空乏相宜絕粒七日亦偶然耳不復

慮及倏忽居諸如以爲毀者是曾參所致飢於孔伋也家表弟日前已至館想蚤晚間晤慰來賜甚謝酒棗是取之縣中者無所事已拜米難甚勞伴信九月朔節哭謝謝不悉所懷

與子庸兄書

鮮民何足念論泉魚之言釋季路之訓仰視格楹徒自隕浪耳兄翁愛惠無己去歲所貽爲老母目覩不敢復陳今奈何從酸楚中接華美之玩乎昔人含憂方之吞炭道周爽然如噉杵臼耳桃核棗花宜未敢問也廣真兄晤對日新西南寶氣自映斗下每想名賢可道胸臆者如兄翁叔姪相與自是夙緣寸楮數行宛然如鏡恨百餘里動煩繫思耳去歲過廣真丈見其環堵蕭條不異吾昔吾既以蓼蟲苦習不慕桂醕而廣真真以桂枝薰於蓼苦奈何奈何兄翁比復寧澹不愧清白獨令厚弟滋其蘭本想厚弟饒爲之鴻鵠相將不爲稻梁唯兄翁努力自勵

與劉魚公書

生德之章去耳猶盈登堂之歡盟心未遠而僕忘其白華自抽宿莽既乏八韻以和半風仍缺九拜以敦誼素雖一時愧集驚還叱牛之聲實千仞罪深難聞應鶴之節也侵晨而出忽適他緣祇今自籌不審何故始信貧賤之腸難爲仁義抑將姻婭之好不及友朋寤寐抱慙家人譏讓昏昏此懷洵爲難白矣蚤致拜又不晤諸兄弟何時刺租會此良期

與劉魚公書

長安晨夕結想閉目惟省禍過日爲幸墓艸未齊丙舍頽圯吾爲此羈縻兩腋不生言念唯有愁歎擬一疏請歸倪李二兄爭執不可不知何時得遂初志但幸主上聖明臣言盡用某一官何論乎京畿桂玉介石無

交家僮婢女作古人饗殮但有慍見之色四顧無力悠泛難親唯兄堅精可冀倫縵帳稍撤蒯緱就道或一至都門微解憂結吾便促一歸路與兄攜手徐淮作浮家泛宅故事勝如坐籠中莫放也風雪愁人尙祈晤言伊邇

與陳無涯無技書

無涯無技念吾良苦舍現成之顏閔圖未就之管葛即使事集無益秋毫偶爾蹉跎則所喪丘山謂之何哉前月已五疏趣歸而苦不得便造船放海欲坐岸嘯歌知其難矣我明與周室同脉非唐季所望衰軼而後猶爲戰國春秋今天子英武聰明同符高祖又有四同與南陽相媲美已從事無拔身之理但此寤夢刻刻在東郭北山唯兄弟知我情苦七月廿二日已奉朝餼克復神州如此重擔何時到家兄弟無可相助當勸人輸誠速期共濟亦仲尼所嘆微管孟子所慨纓冠也監諒千千不盡

與吳廣真書

廣真兄契三百里過此乃不信宿雖有盈門不如蓬室矣春計誠殷然如兄芝田豈須耘鋤乎前旌發俱健力都不及致草草附上此數日雨微下弟方出肅客使行苦迅便不詳書鵬搏信近便此促膝也

與吳廣真書

山鬼有窮老僧無盡從此進之佛力神通猶是覺境吾兄精進忽辱不孝默地混沌施之宙合無復不可也明晨似當過龍嶺抑遲之俟從展齒後慧乎

與金將軍書

金大將軍麾下聞麾下駐豫章號令嚴明賢良諸家烽火不及彼中來者咸稱麾下未覩明詔欲藉雄勝爲

恢復之端似矣今天子神武江楚兩粵暨於吳會神弁歸心不日親征誦江漢常武之詩想亦麾下之所樂聞也諸老有習麾下者皆云忠孝出自天性權變準於時宜以不佞觀之天意已還物極必反痛穢刻於人心明家渥澤尙留天下麾下必欲整旂常之勳垂鍾鼎之業則今其時也永勝伯師下贛州萬吉人師出杉關二君雖與麾下相知然至旗鼓相當拔旃不武以不佞之意欲借健士出九江操舟東下掃寧國宣城之於勢甚便於朝廷甚忠於勳業甚大高皇在天實式臨之唐人有云舍十七葉天子不事而事固豪傑所不爲也唯大將軍留意渴冀懷音

與金將軍書

金大將軍麾下自先數年仰慕芳猷以爲古臧馬之倫需時而興者及先朝蕃錫加以討逆之命僕謂曲阿孫郎復起於今即五鎮四藩不足稱也比見松滋王稱麾下生平慕義慷慨激烈或有感憤圖一得當爲朝廷之用決非落落苟且生活者僕思念欲吐一言久矣凡三遣使過撫州爲永寧王所斷悠悠道路誰明此心今天子英武明博在高光之間得麾下佐之真掃廓清海甸雖古之田疇朱序何足多乎人生駒隙藉竹帛以自老既有竹帛之榮又有鍾鼎之實雖有道仁人猶或爲之隗畧公孫述有何足師天下垂平已極明家之祚尙二百餘年僕不憚出山起而佐之先生何憚不用反手之力成千秋之業耶僕輩書生百不足談所用區區布其伊鬱者非獨黎獻共仰和平亦執手追歡出明天子意也

與金將軍書

前有再書懇懇麾下想見之矣王常下江亦是賢者何必隗述乃自爲豪如其翻然便當囊囊濡足與麾下共挽江河而洗石頭之穢以麾下之才垂名竹帛坐勒鐘鼎運掌耳乃栖栖出匹碑張軌之下可歎也不肖

交家僮婢女作古人養殮但有慍見之色四顧無力悠泛難親唯兄堅精可冀倫縹帳稍撤蒯緱就道或一至都門微解憂結吾便促一歸路與兄攜手徐淮作浮家泛宅故事勝如坐籠中莫放也風雪愁人尙祈晤言伊邇

與陳無涯無技書

無涯無技念吾良苦舍現成之顏閔圖未就之管葛即使事集無益秋毫偶爾蹉跎則所喪丘山謂之何哉前月已五疏趣歸而苦不得便造船放海欲坐岸嘯歌知其難矣我明與周室同厯非唐季所望衰軼而後猶爲戰國春秋今天子英武聰明同符高祖又有四同與南陽相媲美已從事無拔身之理但此寤夢刻刻在東郭北山唯兄弟知我情苦七月廿二日已奉朝餞克復神州如此重擔何時到家兄弟無可相助當勸人輸誠速期共濟亦仲尼所嘆微管孟子所慨纓冠也監諒千千不盡

與吳廣真書

廣真兄契三百里過此乃不信宿雖有盈門不如蓬室矣春計誠殷然如兄芝田豈須耘鋤乎前旌發俱健力都不及致草草附上此數日雨微下弟方出肅客使行苦迅便不詳書騰摺信近便此促膝也

與吳廣真書

山鬼有窮老僧無盡從此進之佛力神通猶是覺境吾兄精進忽辱不孝默地混沌施之宙合無復不可也明晨似當過龍嶺抑遲之俟從展齒後慧乎

與金將軍書

金大將軍麾下聞麾下駐豫章號令嚴明賢良諸家烽火不及彼中來者咸稱麾下未覩明詔欲藉雄勝爲

恢復之端似矣今天子神武江楚兩粵暨於吳會神弁歸心不日親征誦江漢常武之詩想亦麾下之所樂聞也諸老有習麾下者皆云忠孝出自天性權變準於時宜以不佞觀之天意已還物極必反痛穢刻於人心明家渥澤尙留天下麾下必欲整旂常之勳垂鍾鼎之業則今其時也永勝伯師下贛州萬吉人師出杉關二君雖與麾下相知然至旗鼓相當拔旃不武以不佞之意欲借健士出九江操舟東下掃寧國宣城之於勢甚便於朝廷甚忠於勳業甚大高皇在天實式臨之唐人有云舍十七葉天子不事而事固豪傑所不爲也唯大將軍留意渴冀懷音

與金將軍書

金大將軍麾下自先數年仰慕芳猷以爲古臧馬之倫需時而興者及先朝蕃錫加以討逆之命僕謂曲阿孫郎復起於今即五鎮四藩不足稱也比見松滋王稱麾下生平慕義慷慨激烈或有感憤圖一得當爲朝廷之用決非落落苟且生活者僕思念欲吐一言久矣凡三遣使過撫州爲永寧王所斷悠悠道路誰明此心今天子英武明博在高光之間得麾下佐之真掃廓清海甸雖古之田疇朱序何足多乎人生駒隙藉竹帛以自老既有竹帛之榮又有鍾鼎之實雖有道仁人猶或爲之隗囂公孫述有何足師天下垂平已極明家之祚尙二百餘年僕不憚出山起而佐之先生何憚不用反手之力成千秋之業耶僕輩書生百不足談所用區區布其伊鬱者非獨黎獻共仰和平亦執手追歡出明天子意也

與金將軍書

前有再書懇懇麾下想見之矣王常下江亦是賢者何必隗述乃自爲豪如其翻然便當囊囊濡足與麾下共挽江河而洗石頭之穢以麾下之才垂名竹帛坐勒鐘鼎運掌耳乃栖栖出匹碑張軌之下可歎也不肖

擊舟十數日將過星子以濯龍關麾下能出三千人相從雖萬戶侯豈足道哉詩曰爾公爾侯逸豫無期又曰反是不思亦已焉哉唯麾下千萬留意留意千萬

招征書

月前一再致書想皆達記室矣新主以高光之才合殷宗之學禮樂征伐規摹隨手文章性道非凡所聞也台翁起於南陽仲華山桑不足為踰伯仲伊呂指揮蕭曹行於台翁見之留都握手遂合風雲此段精神亦自不偶但不知鍾山孝陵今復何似晉宋之禍豈吾輩之所忍聞挽回無術匡救無時緬想昔賢惟有頓足生平羞談管晏今日見侃嶠現逃亦有慙色每聞秋風思一奮翼濯足龍江之上恨不能促膝招機部晉卿二三兄弟與台翁左右麾其旗鼓耳錢塘道阻日有訛言秣陵動靜常如寤夢王郎子與誠不足驚而吳越豪傑未有來者不知台翁何以教之緩則失時急則促節蚤晚思仗義聲以收勇實藉台翁之靈西出杉關北出金衢東聯海道

盱江建昌之間

想不足以膏黃鉞也仇夫俱未決計幡舊俱有攢

眉必得一當使昆陽無戰盆子坐消非弟自走浙西收合吳會終是道謀潰成耳聞處囊中况俱鈍錐穎末不見溫台上下雖俱歸誠未有定著必令陳夏起於雲間楊劉發於臨吉張祁應於金華錢徐動於繡水則連鷄難飛歲月易邁矣

與劉魚公書

聞魚公甚軫軻都是周罪過想知長安信行止不定故不得翩然遂來今浪浪當如何結局周最不解世情大約簡上是道家所恠吾輩人只須空山看灰燒火決然持此骨頭博浪不得也古韃以來不復知公家諸事參疎既非本名想無害今無緣見祁公談之韓魏公不識王荆老趙清獻不識周濂溪自是動靜頓殊匪

關意緒迥別然如宋人端坐事索喜怒哀樂未為呆死也周出山來雖無豎立於朝家亦無所負蚤晚冀得開籠永矢空山無復風旛之意近乃悟諸丹訣自希夷以還未有悟其欺曲者意欲借樓雲一菴自築丹室募親友共鑄丹井不過費二三百金假三年之力仰視蒼景俯接龍鶴不為遠矣世事悠悠無一足語有意之倫俱攫物網濕漫燥焚固其所也長安獻舍之外煤米便乏又諸種書悉實常浙為腹為目了無一可知兄決不能來即來此間亦無游郊鳴珂之樂徒駭嘆而已風波細軟久當自平不足罣意十一月九日黃道周頓首

與黃東岸相國書

聞領駕吉旋已踰月矣百里瞻言千載勝事周獨以溝壑輾轉不得申摧秣之懷惆悵何極日前拜曹司李書乃知姚永言寄信昨拜台緘又得劉丁書非閣下垂念無已何以得此於朋儕緬念往時顛連寢食唯有揮涕幸藉月骨反首丘隴為願踰涯又安敢聞人動靜去臘隕身百尺之崖肱膝垂折今幸稍蘇神理氣志亦覺頓盡睹閣下書復生蒲柳之色耳漳南道梗行李少通勸撫兩字迄無定算周納足箚中藏頭被裹但知床凡井竈各自有命了不動其經營也正月二十日寇迫漳郡賤體委頓自分焦廬已託野火之下恐出處未明已勒小疏哀請不敢上質知已即有不測亦當以理數自安世間何處無顛崖不復據鼎耳擾其寤夢也行人歸促復艸艸附上即端日奉候興居未悉二月二十四日道周頓首頓首

與黃東崖相國書

拜七月三山歸所惠書令人感歎今諸舌戰想少憩然亦無著手處繇藪之前合有此事無足多怪但括江淮以奠四帥鷄鳴已盡飽鷹難飛前無可進後無所處數月以後將復如何山陵松楸在人掌中異時摻括

復何所極諸山陵使能遂了此乎四帥分江一左擅湖我輩無一旅能舉其事消萌建威徒恃一史道鄰是夫子所歎才難也周病甚素空疎加以健忘見張問李唯坐江邊看兒童竹弓射鴨爲樂耳桑梓又多事諸招撫者日譎言句引愚罔稍稍正之則騰謗四起幾不可聞世運否泰則亦天也人奈之何塵界中著百里百里中著七尺稍費經營愈碎愈細正復歎氣伸足詠彼蒼華耳姜燕老想無歸里行望閣下匡持新命貽我安席也

與黃東崖相國書

得若柳書乃知台翁入直甚喜機絲方勞賴天孫整之不獨星序有光草野餘生亦藉還耕鑿也吳會未收中原無路新安既陷南紀垂絕雖樂葛處此不能緩其裘帶而使弟酸腐書生理之命竟搏免古人所爲笑談也收人才練軍實是今日要緊而微破以後人情太乖昔日所謂豪傑皆不可復仗吾土軍實盡入策陽不肖孤身碎掌所招踰四千人殄風吸露以効忠義明旨亦云就廣信支餉而信州士民盡室入山府縣催科徒有仰屋捐助二三千又當與信撫施軍三股分用肘踵俱決爲之奈何今粵中輸賦見有二十四萬吾出勸助亦十餘萬分其涓灑足佐月精而委之養威不郵枵腹雖有喬松之術難盡授於熊羆矣月前見明旨已以關外重鉞寄曾二老此駕馭英雄收拾孤老第一善著而旋又反汗何也仇仇不力退遂難詳將使不肖何以自處將士既知無權則輕玩以生讎敵又知無餉則禍敗立至此二者在不肖受之不妨亦奈何令宗社受之乎朝無正論人皆養交明堂之羹揚薪愈沸不知桑梓竟當如何也軍中監紀趙士超爲其父請補金吾此志士也幸炤察之小至曰道周頓首

與黃東崖相國書

東崖先生秉鈞甚善使弟得有首丘之所亦爲邊疆蚤得綢繆今日事勢比之五月十倍艱難五月祇苦無君今日幾苦無民不獨無民且苦無國弟之區區豈薄叔度而師文淵者垂老未死恐及披髮之事耳今廣信以北七八十里即爲異域弟提數旅手揮空拳以控鐵騎痴童之扼虎亦各其志也而徽州狂叫之士日生異說奸細出入半在軍中今日不去即馬革裹尸亦不可得耳四千之卒以四分之兩在休葵一在饒撫今休葵者挫損幾半區區軍中僅千餘人而騎千數逼於肩背不知朝廷何以籌之弟爲前矛刎頸之士屬觀易動想定虜乘之可奏奇勳耳出關已踰月于愬稍來常恐吾創之多賴吾兄持之得入大安關卽爲厚幸不想鳳輝堂也草草原諒不悉長至後二日道周頓首

與黃東崖相國書

前兩書達台翁想已目及弟絕口不道功名獨以初入關時與朝廷議置行在於信衛二州時人祇知有衛以信爲江右了不著口爲弟迂闊也弟竭力明廣信爲全閩肩背僅有此一重藩籬比衛有兩倍得力是以不憚區區致力於此至信乃知徽州距此祇隔一嶺有四路相通覺前言之未盡耳吾鄉人慣走金衢但稱金衢其實要害全在廣信也永豐有自詹如兆垣俞墨華二父母皆可借重料理本處兵餉又鄭父母汝說徐進士敬時皆實心體國者今朝廷動以台省獎勞人才至於要緊所在全不著意萬一破壞悔之晚矣弟五千之卒以二千叙於休葵二縣雖不大潰已損二三百人又千二百少挫於瑞洪亦損七八十人雖殺傷略相當而無大破軍士不大走獨牛明山四十級爲對敵所得而談者又云不真一身無據十口難分進退趨遑而軍士之情散矣左右魏赫日以阻撓爲事散掠人財而歸惡於民高坐不出而笑罵相噴前自十月初九師休葵之口踰四十日乃有旗鼓相及雖有熊羆化爲鼯鼠矣見二老代理之命懽感不勝而今又杳

然不知何日得還清源與素庵諸兄再啜勺泉坐竹借亭之上也。破敵後諸軍漏言弟欲出休整遂併力於此前月廿旬以五百騎守我軍距海口去黎三十餘里稍爲之防至冬至會節寅夜劫營遂爲所購兩營俱散賴弟所募樂平兵至乃焚掠而去今初七八間又聞召杭騎數百來度信睦比隣其所必爭弟以孤軍四面牆壁雖咫尺共事無相援者逝不去此恐有林貞金聲之虞耳別軍去撫昌者已收拾安仁餘干上東鄉進賢掃金賊以朱序之業委之國士藉鍾籬之靈看蚤晚可收而樂平勁卒已搗休寧初九十間報大有斬獲然未敢信也弟孤踪獨手受兄翁知己之誼不日夕憔悴不過代諸貴人捍禦耳初意亦謂貴人不弟不敢安居今貴人已出弟可以還矣古云太白不出星辰爲客今弟可爲主未也三月生一小兒呱呱未字家兄七十。懇弟歸山此情唯兄翁知之不武不文不進不退昔人所謂怪鳥也非獨怪之而又呆甚兄翁幸念我老六飛在建寧弟當入關詣候唯垂慈不悉

寄家書

自還浙以來無日不思歸家展墓告祠以畢餘年而時事未定廟社未安桑梓與天下均未有寧栖之日安敢與奔逃偷樂者共著還轍爲千古之所唾罵生平談禹稷不及顏子今日思蘧瑗賢管仲遠矣當此渙散之期無一番收拾雖吾鄉丘墓亦難安枕擬以七月廿三日出師倘有三千之士可以隨處鼓舞聯絡大則江東西而日子迫近錢糧未措無一千家丁可先應手者路上夫價騰沸親朋不得往來吾鄉爲鄭家收盡後事難圖衆力未集雖此處調募得一二千無益也蚤晚看黃明輔到可與共募能廓清吳會恢復孝陵即長揖還山未爲晚耳

寄家書

去歲臘月十九日得解網至今歲正月杪始出都門想二月半間家中可知消息聖意無甚苛求而諸老苦不放手此自生命帶來於人何怨原票煙瘴則在廣西地方便道至家而兵部必以西陽相處謂西陽武陵之傍郡意欲相難耳然武陵已死禍敗昭著朝廷公論久必自明吾至西陽亦無終困之理家人切勿以此望於懷也吾從此便道亦可至家然一事未了終是懸懸非久遠出反自費心乃決意溯江西至武昌繳此衛案大抵至武昌繳文書身至西陽不數月可借差還山耳此事如不明白自關國家事非獨吾身家之憂也諸說好話者皆大家寬慰之談不必聽之吾盡吾道以俟論定閉戶著書儘可自老非必軒冕能解人懷也墓上諸石可擇日子平安一一除去每夢父母身未康寧開襟撫枕唯有悲歎即欲改葬亦俟今秋吾自楚中東還也覽賈慶子讀書進益何如恨身不能隨至觀其哦誦當時令知伊父勞苦勿著采色勿作戲語勿輕跳與小人交處時時讀經典令知道理也吾最不喜人讀註子無益於事反多一倍工夫切宜省之如心事稍通可從叢書中取劉回說苑新序并韓詩外傳讀之可知故事又有文氣并讀左傳國語可通於春秋亦不至腐俗也

在徽州寄家書

三朝顛覆矣事宏光而宏光蒙塵奉潞藩而潞藩銜壁栖遲此身即老死牖下有何顏面生平恥爲一節之士從此遂志亦無所恨但恐爲會閩所笑耳爲子當孝爲臣當忠無所愧而已廿五日至初三日發婺源初六日至新安欲往金陵當在五六日間此行洪亨九決不可與相見即見亦無全理夷齊巢許之間吾知所處矣

與內書此篇與洪氏刻本與內書第四篇大同小異○此本詳洪本略

思量住居只宜以墓下爲便漳中親戚難爲周旋俟吾解網入漳歡聚未遲耳歷來未有恩惠及於鄉人遇諸貧子可稍稍賑給云冬下送方先生八兩宣四兩或明年止用十二兩請恩宜兄弟有子所謂因不失其親者也前屢寄書欲璧謝諸贈惠而魏親翁又對客入京往還傳說深爲不便今對八百與吳都卿納草尙二百在陳綠繩處欲盡寄盧丈還而行旅長途未免罪慮能盡數璧還免使兒輩負仁義之債是吾所待以食寢也墓前享堂未可輕拆只前後牆基打除乾淨北白出門吾便可歸矣黃任買瓦再發二三金界之恐春雨牆傾又費事也田尾小橋並遣人料理吾病體已愈諸不盡言人參二兩付爺壹兩尹娘并查之

與內書 此篇亦已見洪氏刻本與內書但少起處五字以下十四字

五爹戊爹及時培概不及耑書大約吾病體已瘥看百日即可行立如常傳言上一日問大璫云黃某外間人人推重是如何璫云它多讀書亦有操行是以人重之上云前日處他太重了又云上問黃某畢竟如何或云讀書不曉事耳上云此便是朽儒了大概此後無復重處之意亦無復重處之理蹈仁不死是吾生平之所自信也前對聖主言東人必爭寧錦又言流寇必破夔門郾賊必入漢中今言言皆驗惜無有爲主上談之者主上止愛陳司馬至鄉貢一榜盡賜進士可歎今楚事大壞非臣子所樂談然楊司馬踪跡亦不能終結主知矣吾在此百事簡省冬春之間看有解網當攜子長登華首峨眉而歸子淵切不必來諸親戚並爲謝謝十月十日西庫書

家書

自去臘過北司今又六箇月備嘗諸苦念梓桑墳墓邈如天上賴天地祖宗之靈七尺尙存起居無恙子淵柴敬扶持朝夕勉強談笑以俟解網耳子長歸想已到家人尙未至京覺子慶子慶子大爺看管讀書識道理不昧忠孝大義足矣悠悠世道仰問彼蒼五月十六日在北司頓首

與倪文正公書

洪思曰甲申墓下乞休時

鴻寶年翁閣下往歲別剡溪時不知口占幾南乃使兄獨賦無衣然弟亦已病如蚤蚤炬虛決非驂服之具又空拳握錚無爲也比讀大疏所以仁義緯繆爲定命辰告者甚善當此仰屋浩歎之時爲百年必世慮經權互宣中於賡理乃知劉東山林待用之賢非其至也蔣子卿一遇方歎遂奮驥步弟恐楮幣不足以當杜蘅也國僑有言亦聊云救耳海內人才沉毅萬傑唯有楊機部而縱之高蹈弟命奇窮久無意人世去臘出行江東與諸生鑿一鳥道徘徊之間遂至失足直下懸崖二十餘仞幸得不死又與黃門北司同功樂正子春之所悲啼亦塞上老翁之所發祭也憶臨行時曾領平誨云枕流漱石不如喫飯着衣今遂迷誤至此寧復有洗耳礪齒之樂乎蔣八翁嘗謂僕以酉運破月建恐不可支周亦以此決意空山終尋君平之業但縣隻眼看鴻兄鐘鼎出於岱華之上耳今既折肱終難叱馭而墓下風鶴日聞狼烽不絕若士山阿能屬固守已爲幸矣爲此力疾乞一休致政府書幸轉達之并道六十老翁三番不死亦無終日蹈焦原涉呂梁以爲快樂之事也病腕不能多作揭并藉行人致銀臺司爲禱外附孝經大傳洪範明義二種請正正月穀日道周頓首

與倪文正公書

洪思曰癸未墓下乞休時

鴻寶年翁見報知始入都魚水之歡上慰宵旰口騎聞聲以次喙脫帷幄有人喜可知也去冬道病常恐不

得至家及睹丘隴想望松楸始悟生還之恩隆於蕃錫草木狐兔俱監此心初夏來遂成怔忡耳眼昏沉神明漸廢又飢戎薦至婦子啼號南安之寇初平浦西之亂復作流賊焚掠去墓下不一二里中澤哀鴻遠依盧次瓶粟已罄頰飯難週康成之里無名孫期之鄉莫恃誼不敢舍丘隴以入城市不知過此將復安之也世棄之人呼策艸木無復動理不知當日田子春太史子義何以屢成壁壘行成騎伍巨靈之手非復雞跖之所能模也姚二存後來之彥氣誼最真依依於兄匪朝伊夕不知兄何以教之二存使來適賊稍退聊簡荒札情緒不倫聊鑄晶章紫紵二方附塵左右并問馮鄴兄起居如何八月八日道周頓首

答倪文正公書

洪思日癸未墓下乞休時

鴻寶年翁九月初旬山中得讀大司徒諸疏嗚呼者真婦人耳天下人材止有伯祥次則子今乃使子卿先之愛騏驎者引譬於郭隗也弟抵家伏枕墓下蒸濕侵尋下部遂痿不任屈伸入秋胸膈大作痛倍於往年七月以來盜賊騷張哀鴻嗷嗷幾使孫期不能保其豕圈鄭元無以安其唐肆去冬三疏已下皆不及知家僅回以八月十邊始抵廬次賊雖稍退而病殊劇便已絕意世途銷聲隴首陳臥子乃兩書嘲讓曹遠鄭本作李實方至以爲僂蹇丘園辭色俱厲如此穿衣喫飯再不由人枕石漱流亦無著處也世路即不以廉恥待人士君子當以廉恥自與厭渴之詩似爲道周發興耳飢戎之後若華鮮飽遣人入都亦甚不易不獲已趣前僮再疏冀得一當終老林壑而已臨楮旁皇道周頓首

與蔣八公書

洪思日癸未墓下乞休時○洪本誤作與范文貞公書

去冬疏上已得溫給而中外無知者信天末之遠也六月始見召對恭紀至八月家僮乃回接閣下書時敵鄉賊正嘯聚哀鴻嗷嗷周坐牀箦中與逃難餘黎相對唏噓真不知世上更有江淮交豫乃知身任四海者憂患更深耳八月後纔稍平鷹眼虎睛不能盡變終當復來此時得保松楸爲耕鑿餘民秋毫皆閣下賜也自六月杪不復出戶下體益委頓動轉不得帶與筮魂爲望已極諸悠悠者謂僂蹇丘園有乖臣誼以周之意老病殘軀終難報効但爲朝廷存禮義養廉恥使簞下無狗苟之人以此報効朝廷於臣誼無所闕者而談者又謂單薄徑途無以結讒謗之舌自度生平與物無競諸睡毗者已見殛於明神伏辜於斧鉞今諸元老抱鏡當心總千山立寧復有得勝其說禮六十不就戎行明年是矣雖下愚無似亦欲掩關尋周孔之渺慮繹參軻之遺說即使閣下哀其貧窮勉以榮藉然二人已矣雖列鐘鼎羅牲牲牲無所佐其七箸古今賢達掩沒神莽者何限何必以無田不祭動其悲皇也周自審已定雋氣靈心妙才定志必屬倪鴻寶馮鄴仙二兄乘此兩隙修葺東疆料理車營教練關士防東人之再逞專責巴蜀順勢以討荆郢循古者秦吳破郢之道陰移沓渚之舟師以奏長岸之偉略然後收拾吾輩束之高閣示炳文蔚章之不足服也究竟成敗不存於寇口禍害不發於邊疆周輩蚩蚩餘年幾何仰藉帷蓋之不暇而波瀾費說過矣過矣諸具疏中乞得一當幸鑒念焉九月六日道周頓首

與盧牧州書

聞足下至浙東喜溢寤寐不獨聲氣可通亦形勢相起也會稽阻於長江欲取吳會非勾踐之志種蠡之力不足一勝要當還其精良西波禹航從吉安廣德上撥鐘山猶或可及耳弟以空手呼兵呼餉於無人之處信州自聞徽破比屋入山無復雞犬索米一月不得千石供四五千人之外曠然量沙談梅無一是處

足下擬過其倫又以非堪見薄近見曾二雲見代之旨體貌隆重如鴻易燕但不見下忽焉掣回想此危疆非人所樂疥癩馳戰豐車終無交割之日也微睦相連一重門限除是天下愚人負輓到此無由晤足下吐其伊鬱耳連日出師在婺源上下與口角逐雖破竹未成而迎刃將解不知海上長鯨誰當佑其短長者武人掉舌終是捉影捕風龍涎雖香要非朝餐所服矣以主上聖明羣賢畢力而獨令天子憂邊中原與窳日尋被髮孔門三尺安得不道桓文乎粵中輸餉二十四萬福京自徵十餘萬而僕不得仰其涓滴安望復齡詣吳門問白虎之氣今亦當與吾鄉子弟撒手懸崖耳沈有孫幸託宇下甚佳後來可與共濟敵門徒徐柏甚承盼味業與一銜俾爲軍前措置些子儻得支持過歲亦是朝家之福不獨吾輩共襄大業也因風懷想不悉依依

答蔣若柳書 癸未乞休時

八月家僮歸乃得稽首讀相君書何垂念溝壑之深也自少疎逸誓尤日積腰領膚髮幾不能保幸藉相君覆蓋之恩吹其餘灰假以微息俾從狐兔歸首墓下又讀召對恭紀之文繆承賜言動明主之聽海內傳者謂一天雨露全爲枯芝此誼不聞亦數千載矣道周以孤貧殘生垂死而得之雖千鍾九鼎不爲過也欲於此外更盟起立譬墜葉之望寶珪朽株之希匠石不獨想念不生亦情理俱絕矣盜賊縱橫孤居墓下報人不知惜才改正之意反以述旨繆誤見譏踟躕餘生唯有傷歎近以苟且撫定稍稍蘇魂問日邊之信存中澤之音欲再乞恩終老丘壑方今鷓鴣成羣麟麟溢園欲以病駒怪鳥強溷其間徒足以煩庭氏之朱弓發國人之一歎即欲摧筋洗髓自報効未由也矣自去冬歸臥墓下山氣蒸濕下體遂痿勉強扶筇不能出戶眼痛齒重以芹柯難灌以金液不能責其強立矣小疏委出至情幸相君垂惠俯悉彫殘萬里離家動止不便容其待盡山下保此遺骸亦相君賜也艸率空函謝謝九月六日道周頓首

與蔣若 書甲申乞休時○與卷十三重出小有異同

去歲秋前 知兩疏奉旨何 久之比八月家僮歸乃知爲惜 溫綸眉目始開又讀 紀鹽

梅發香爲 葬生色敵 衣無復登堂之理但得俯念荆著識之千秋爲榮多矣吾鄉 空山疏陋魚

雁本 相君諒之蚤也漳南嘯聚之羣動至 萬度其爲患甚於南 江左震鄰而後無復靜理道周以

松 託於荒野每聞風 有村落遺黎 下頰飯甌粟濡 無舍松楸以就小艸之事去

二月爲諸生強一出行 江東絕壁中隕身可三十似皆 嵌空觀者不祥又歎然悔其多過矣自去歲十月以來低回二百日豈有他途沉吟自訝雖誦詩豁其心眸終復喟然長歎天下事自在偉人持要挈領讀書知言又在知人安民而上如舍周孔詩書而外別有神方亦庸醫之所反走也吾鄉先輩經綸夙治又與兄晨夕上下魯陽之戈折箸相成弟以擊壤餘生仰慙古人近愧劉尹自寢處墓下以來兩膝重濕每值風雨將作輒大發悶時復刺痛不堪步趨雖荷殊恩難於自奮周素不作假而世人恆以迂誕見督唯兄知之如使周輟柔翰能以強把大戟與假面抹額周旋則是可前也如猶書生者量已量世何可不蚤弟亦休矣

答劉念臺書二

洪思日必癸未免戌歸江東開講時

斯道無限願力易窮至於暮年止得怡情山水誘進來人留些少清輝爲現前受用資後生探討耳伊川歸洛下元晦還西山其成就與當年亦自不別晉人亦云祇有動靜之異原無優劣之分也先生道貫高堅非

復前後敢望然云古來傑士磨頓之後鮮有樹立此田書所進陳瑩中者恐元定晦翁聞之中卻耳君親之外唯有師友做鄉關在天末模範難追又以老鈍蕭然自實聞大教迫於警枕病驥扶鹽車不離鞭策亦頓踣思起也前兩次寄扇頭凡七言八章想都見之嬰兒誠笑動成黃葉以爲俎豆則不可以佐長者捧腹則有餘也

答王忠端公書

洪思日甲申
墓下乞休時

尊五年翁冬仲從何園子處得拜手教天上貴人乃念窮交一至於此真可以塞破屋子也弟乖蹇自放無一足述而次公親造敝廬錫以言詠每讀其論著想其興懷晝夜味之河漢無極也弟病廢已久僅以去夏稍蘇得一晤對過此遂頽唐不能出戶想念吾甫後來諸彥龍驤奮騰非復老馬所望亦樂一見之開其胸眸也天末間關遣使經年每發一緘頭鬢盡白天上蒼茫不分遠近但言萬里三月可度猶云牛女共在東河也去臘出行至江東登高送遠偶爾失足投空直下幸藉台庇頂踵俱全而神理播積不可復藥至元正杉撫猶未去手私念天意未嘗投艱而孟門太行無地不有世以敝屣相捐周亦以敝屣自命愧偏落線事笑人想唯尊兄知己發其悲痛耳天下顛隴甚多匹夫納溝無盡周於其中猶之塵黍何足動達者言念乎語云鬼神有不護之身君相有不造之命僅以右手力疾艸疏乞休年翁幸爲當道憇患知九折之肱決難叱馭已溺之灰不復思然也秦蜀楚豫於人身有何干涉非棄置所當言亦非所當問悠悠鬱鬱俱託彼蒼耳穀曰道周頓首

答趙景之書

嚮在靖海寺承賢郎過顧七尺玉立望而知其千里也是年芳蔭盡在桂林數問賢郎及陳明卿子無有晤者今又病絕尺一往來雖臥子諸兄亦寥寥曠疏林下老生得與狐兔共尋丘隴自謂過矣新詩淵暢教誨殊深亦作八詩錄諸扇中骨節音響皆無一似正可發一粲也兵荒無措處遂借一封附虎尉者去生平硜硜四壁自逸值大事輒縮手不知當日田子春太史子義何以召衆卻敵呼答如響正無柰何以匡坐彈琴消之凡古今卻掃彈琴者盡無聊賴非別有神智也一笑謝謝化州公文章政事驚人如許并與賢郎致聲謝謝無盡

獄中答盧雲際書

辭墓遂出門不及再奉慈誨想念長者循萬石之架蹈彥方之闕以師世淑人羽儀鄉里待時而動此樂何極古人云千將莫邪必有一缺蘇門柳下到處傲人此刻鵠畫虎伏波所遺誠於子姓也舍生取義既無益於君虧體辱親徒有乖吾素耳雖云由命亦學問生疎之效也今兩月以來尙輾轉牀簀未能坐立視陰顧影日晷無多不知何時能反空山以畢學易之願北風時作鄭本作雨羽中夜泣然感念贈贖宏仁非誼所安已屢敷家人隨分拜壘而親朋未晤拮据爲煩猶享白魚以醇醪無濟於解網矣魏倩老何園兄想已出山諸親申悉惟致謝十月九日道周頓首

與張紹和書

兩載未能造候貧賤困人一至於此筆人持先生書還不見遇又失報問道周自分棄置唯汰沃能容之亦惟敢以此容於汰沃耳按筆人以下至此鄭本作曰對俗儒問學業入之太習則太壞徂冬涉春家遂不能其石稻婦當無禱母當無裳登到虛無與天作岸如何如何少宰之喪不遂奔赴要以磨鏡非宜一縑難得

兩足十寸僅能街頭日走二三十里過此以往未之或知桃花初脫谿下無人何處井上有一李半李可開
枯咽除蟪李外又成鷄鳩欲託銜其甘根恆恐蹙然獨步而反也天地信太闊不審幾時行到芝山雲社臨
風貢悃曷悉相思正月十八日道周頓首

與張紹和書

汰沃先生抵家既逾月周末候與居疎懶之病唯先生諒之也長日落落如棄世人未知世間更有何書可
讀晉兄著作近幾多乃使弟不得領其毛羽遲候入漳先拜仰弓次修元方之敬也薄儀少助劓劓奈何麾
之寒冷良用自慙乃令人不敢與千秋之事見三月之外原封宛然便不敢再塵笥篋慈谿君並致意洪思
子寄刺資助紹和刻七十二家紹和復書云承隆賜深感
遠忱第世間無翰林先生特未提贈人之事敬附璧返

與張紹和書

洪思曰時紹和失
偶子作書慰之

紹和先生聞有梓曰之慟自夏五而今遂近百日道周乃以伏免窮猿自懷傷涕不得一望總帷灑此漏注
如何如何紹和亦於世間取何等寶而爲造物之所斬吝冷月淒風不過欲聞幾痛句耳知先生不傷留許
多年厚奉伯母安仁閒居之賦當不減於射雉也他人值此要亦常情僕嘗臥齋頭近十日盤盂半可勒銘
而關脫自遠誠慙於衷自盛伏渡海中感暑病風奄攝數十日初秋來浦又病肺言不可出欲作悲秋嘹嘸
之音誠非所長故寧爲空胸自鬱未解今先生之何如巨源識度蚤勝阮嵇但不知窺牖無人而後能遂忘
情否耳僕寡特餘生與六親濇泛自顧一身飄泊塵海獨居廬舍無似人聲動二三月如先生商音凄絃猶
似爲有曲折如僕者噴於廣野豈有人聽之者乎仰視雲樹消其寒風伏惟舒豁

與張紹和書

洪思曰時子奉旨將母歸家適紹和居武夷山中刻七
十二家子過富沙不相聞知紹和遣人奉書來浦申

紹和先生手翰到甚悵恨作此艸艸不及問青谿之業致令猿鶴愁怨更何顏面談人間事乎周自去秋便
杜門唯春前一出荷天地隆恩以通籍未久脫於繪繳此時史令方嚴而周冒昧獨請遂還山阿爲人臣子
得此生成真不知骨血之爲吾有矣仁丈飄然決幾獨蚤覺林宗子龍猶有徘徊顧瞻之意此番出處當以
足下履齒印鎮一世無疑南大中丞晤之三山兩日之力僅一拜轅門而去承惠口至極注存之感又以此
復紹和動定萬里冷塵唯此半晌稍親溫火過此復爲飄葉矣館席雖啓甚爲時輕有意思人切不欲就想
弓甫知所自擇閨門晤文起文起亦多致意仁丈他貴人不易得晤晤亦不易啓齒落落石玉周與翁丈素
所相向也今人極難別識乃不如別識古人之樂周仲先如何品題當今周在吾家文強而下兄在申郭之
間如此吾知免矣晉耶吾之肝膽何日復入懷中卒卒未申一候臨楮七魂俱往不悉媿負謝薄儀致上
引意

與張紹和書

秋來稍近煙墨每一搨管唯聞猿嘯取凱甫行狀讀之增其酸楚耳臨於悲風擬作小傳於此取之今爲集
引表碣遂渺莽別道一意不足以寫凱甫要令凱甫爲風吹其棘心也秋後當強步一訊天柱之巔念凱甫
南巖時雨落花飛猶在昨日不得不歎銷聲料人情意所屬定非悠悠者知不識山阮復當何如自凱甫沒
後來彥淵嶽不得不歸謝瑟甫未知瑟甫可復往來乎

與張紹和書

洪君曰時何喬遠上疏荐紹和爲預脩實錄奉旨部覆紹和時答書曰近所爲變籌出處期望變者過
春變年過三十便對人說鴻賓豈其雙鬢盡班忽爾作雁鷺意萬萬無此不韻幸兄宜露此情使共知
之

何光祿疏已下乃未悉君意嚮得戴觀察書亦云紹和仰視白日非遠奈何附人雲中僕意亦爾爾今想當
置之也林宗伯晤中亦躊躇未可定欲俟君意詳議之大約艸廬白沙不可偶紹和未應輕就人車命姜神
超鹿鹿猶自可紹和似當曠然僕入世來久益俗爲文法所繫想念碧梧青霜之下如三珠樹不可復慰

與張汰沃書 真跡補錄

汰沃先在時在南巖籃屨往還無舟車之苦出從三洞入擁百城安石常云如此去夷齊何遠信然耳都門
物候百倍異時樊籠之鳥又無水餌四顧毛羽何以能全口口據關內日益固雖窳卻可導而批擣無人偷
隙視陰不濡不熱自唐宋以來泄沓之態未有甚於今日者一番人馬百種元黃昔人借催官之符今日資
翻案之手輔座既心薄外廷廷臣又不圖心競意氣既頹精神日靡而天子猶徒以文法督責之病鶴休糧
求其飛舞豈可得乎小小兵譟輒戮撫臣不切工程動夷長者自今少年亦無復喜事之人驕兵終無可制
之法目下事尙可爲而措置迂疎瞻言千里大臂之指責甚提刀一法之繩資其汲井良亦難矣夏至雖熱
非口所憚大兵雖集未滿四五萬尙憤憤未有進取之策養之異時又成烏有不知冬下四體更如何耳登
樓去梯爲策已遲辭墓依廬悔之何及唯寶重萬福朱節菴恐已出不及寄意三華同此並荷千日朔後道
周頓

與張汰沃書 真跡補錄

元正滯海外遙候興居想都清豫萬福弟遂患病痿右股作痛不便行立左臂亦悶麻如刺所少未聾育耳

口信比如何倩翁前寄來今又十日許臨德動靜寧可問否春鍾又復來未能開晤筆時謝倩翁更遲報命
也廿六日道周頓

黃潭浦集卷十八

書

答葉文忠公書

洪思曰蓋葉相君向高也時實子有母之喪水漿不入口者七日
日文忠公憂其柴毀也有書來弔作此為謝附游支提者往

二月望後人還致慈誨跪陳賜奠慟絕牀前某以艸莽過承厚恩母子間關披睹日月生遂首丘之歎歿邀
北牖之間誠不自圖膺此齒遇某自早歲絕意寰中屢泛煙波尋死物表直以老母糠覈難終捉鼻就人償
此夙責於今已矣含暝之後敢斷水漿冀得悠然栖椿泉下七日不死迺復幸存今遂經年瓜李復及緬思
往時板輿都下望老師之歸塵哀黃鳥之莫載入門對泣伏枕褰衣豈意歸來子舍未期成此窮鼠傷哉命
也如死可贖人某必以半百之生代吾母大畫之命如死可再死吾母亦必以某代死之命贖諸賢者已死
之生今乃令諸應生者皆死應死者猶生是某所七日而後以泣代漿者耳去冬師母歸塋某出哭已久而
風寒無有動理嘗望北斗禮此函丈近唯海氛日波月漲四壁之軀涸餒相求鑄底不存頰飯莫續中夜出
柝下墓噉然大號誠不如蚤歲豁然辭親離家孤泛烟水時之近於道也釋子千如將過支提附致謝謝並
候興居萬福外繫晶章四事哀其貧薄道阻不躬

答鄭元岳書

拜書知吾師已至留都為朝野私慶天子聖明以根本為憂禹績自在豐芭何必宅揆乎周比苦未得歸誠
不忍張目見都邪僻與日月爭道天子明明以虞廷自將諸臣明明以斯高報上憶在烹朝權璫操柄尙容

七十餘疏屬廷孚號今乃以應詔求言之令爲監誅誅之律每念指摘浙事顛倒縱橫何異指鹿爲馬時乎標逆案以護逆案構科場以證科場如此心蹟嬰兒所知而常痴詫以爲三昧在先朝中不知何者爲比士君子讀書致身帷幄無攻擊構圖之難無騎虎難下之勢而一旦決裂遂至於此鄙智羅倫往蹟難追三百年讀書種子於是幾絕矣浙場論題只剖義利宗依堯舜引伸二程之論耳遂以爲怪僻不知天下明達者安所得不仁不義之言而稱之如此舉止是有宋諸奸所未敢遽下而今皆明目張膽行之良可痛心周早歲學道廿七始就青衿於萬物無所憎惡然既委質事主不得談方外糠粃之論今天子庶人一切以仁義堯舜爲邪說則人心敗壞何所底止去歲南中台省摘一學憲此中無識遂指以爲浙闈線索叢毒百方周艸野出山誠不知人情傾險一至於此今惟有一去無所復關人事但念聖天子英明沈毅爲此輩所誤使熙豐之事復見今日早時輕詆子瞻晦翁爲露圭角今殊悔其痛哭淡於賈生耳秋中想可得歸天子既釋雲間則來茲冀無他禍猶恐諸無所釋憾者以周爲狼毒之木耳周病去不復挂口老師千惟珍重涵宥不悉

答錢機山相公書

自垂翼于飛而後天地日就崩頽凌遲十年遂無岸谷雖云時會使然而奸回崇獎黎老播棄彼人爲之貽我君父何可誣也南遷之倡方新當璧之檄四播法旗不舉義鼓寂然鄭如水滸定之量短於用師路皓月拓落之姿猶堪鞭策而相顧栖遲謂江左之夷吾辭中原之管葛乎人心方寤達日則新從來味氣與新君更始元良朝夕正位留京則禮樂典章宜出先生之手人心所係旌旆以興倒耳聽之更脩孟卓之盟扼越石之駕溯流東上劉賊必西奔然後北扼清河西扼湖口暫紓秦晉徐收湖湘進不失桓劉退不失葛蔣拔

刀斫案出鞬畫圖在於今日矣誠使宗祏可鞏必無五王之慮若令哲人接履猶有啞虎之嫌艸野啼噓聞見不逮河山脩阻投袂莫從望風慨然啜其泣矣某不勝臨楮悲痛之至

答陳明卿書

明卿年翁三載契闊而三接教音幽人天末了不能酬明卿呼吸上通聲名下遍猶念南方菰蘆之下有黃生者北海之思孝章扶風之稱謝該亦以潤其齒牙非爲資其羽翮也天子聖明休風日扇圖治有漸爲政在人伐木之聽和平小明之與正直每告同志兩言而已前徐霞客來持素縑不之敢領瞻望神骨知爲異人夜闌秉燭談鍾山採藥之幽聽雁湖縣短之險如逢明卿啜茶天台勒銘雁宕恍惚魂交識於寤夢也廿年以來僅成一書聊資瓠覆外唯加餐萬福有教不盡長至後道周頓首

與張湛虛書

湛虛年丈龍鴻襄天不忘魚鳥溫涼變序尙憶綈袍去歲秦蜀之惠於今三年使我悅艸之情重依覆被灰溺餘氣忽焉生煙溝壑斷姿居然賁績誰實爲之莫測化柄之心何以報者猶有同澤之意弟自起艸以來藝松永矢嘗稱逸少之器十倍淵源舜卿之才萬分德遠將由深淺異量故舒卷殊方非謂宅平之勝於居險也邇聞口警迫我京陵自省餘生誼難偃蹇遂以蛙娘之氣謀及鷹旄馳驅之懷通於罔極輪蹄一動不可復迴顧念小山啜其泣矣杜翁云在山泉水清清則可鑒眉髮出山泉水濁濁則不見面目比來四旬始走三千餘里自顧面目不可復認寧當從年翁辨其纓足乎口口雖退鷺伏滋雄煙火初灰燕雀復集堂中湯藥非棄婦之所宜親厨下燎焚又非遠客之所及搏行行不已意欲何爲年翁想爲宣其驛霧也嚮在粉榆適聞司馬前命天下方注其雲霓今日需才倘有建牙來章寧可較其邊腹乎人心易散才且難求格心

之業既落空談輩後之圖尙資廣德屈指宇內心膽識量推我年翁智深勇沈有力有德過都歷塊似此無
多年翁蚤晚趣裝弟當從之爲着鞭矣堯舜之朝叢求元凱一木大厦四顧誰鄰正恐萬里投身爲穿突之
羽也歲序又更時數堪堪伏惟年翁爲聖主蒼生千福珍重

與魏中嚴書

入都途中

前出山時姻翁有勸弟遲行之色真遠慮也弟以風濤無復寧理安枕頽流終覺未安艸艸動足遂兼壯罔
之忌正不如吾姻翁識力福力坐鎮一世耳過鎮江東路似差可行然士紳共趨亦甚凋弊利國驛而上亦
復如此云至北直則中貴怒馬日十百輩鞭撻所施不避寧越悠悠世界雕琢盡矣從江心望睢陽上下塵
莽蕭然終日不見一騎便似絕域如此半年則南北形斷加以光固之間土寇見告壽穎之際勢無安臘瞻
鳥跋鹿我勞如何已一月不見報楊文弱儻奪情天下豈有人理劉念台極得出處之正林紫濤脩邊疏尙
未覆亦未審情形如何弟歲暮恐未得面恩決意得請不知何以報我親翁者徐孺之告林宗每懷勞念

與魏中嚴書

夏中得姻祖太夫人訃榮哀之懷忠孝之義在罔極中同此疚心而補衰言旋屬續視履非至性通冥有難
得之君親者矣天祐格人誠孚粉社瞻懷蒿蔚何能不悲每念先慈茹荼擁絮垂八十年不知鍾鼎的爲何
物九原相遇雪涕如何弟守廬不終聞鷄破戒移勒之痛甚於絕裾入夏以來追惟往蹠誠欲碎踵炙踝以
答祖盟而身既投籠烹割隨主髮膚身體無一爲親乃知閔篤在汝之義深於神禹也中原塗炭既八九年
哲匠括囊又非朝夕匡扶勝具唯有親台而又遭回沖渙如此左史所譏長宏徐孺之戒林宗準其遺言不
爲過矣上以誠求下以貌應巖廊邊圍一大戲場至於聖主之所注存則孟浪愈甚師錫鉅典遂成呼盧不

知蒼生更何所繫屬含淚向別人正不如墓上自家發涕耳孫上苑淫羽於漢陰薛韓城收功於副墨放狙
方去蠅集又來加以義馭遠城軍容南討祁父藉此以奉爪牙司馬因之而生羽翼雖陳張斃於桁楊而烏
巴留其梁笏終風又曠曷日霽清弟以狂瞽疾呼屢瀆不測恃有天子慈明寬其項領王餘半體之魚枯楊
復生之穉戀戀感恩亦已末矣江淮稍靖決計賦歸晴乾淋頭度之已審想汰沃諸兄亦度其底此也擬作
王母誄以荒拙不復能莊輒爲四詩以當一勳并附絮炙先於東蜀唯親翁諒其疎率也小疏艸附請正不
悉

與朱節菴書

節菴親家萬福屢蒙大教開發慰藉常有夜雨連牀之意弟之疎鄙兄所習知然自經經不解好醜四十嬰
孩嬉笑膝下不知世間縷組的是何物而鄉里貴人強以是賜職四月入京者造諸不根使人聞之憤悶欲
絕此輩人只欲自作官耳何苦必以弟爲薦席乃爾今春母子日夕依依想望家信不至而此輩突造飛語
迫弟爲不得不歸之勢嗚呼此人豈得爲仁者乎弟視一官輕於蟬翼但以老母遠來未能脫釋都門勉強
栖遲視月如歲又生平讀書稍近寧澹豈爲腐鼠弄其齒牙而此輩識痴終有芥蒂弟亦當遠領空關避其
矚繳但四顧親友無一心期仰視明月下而顧影真不禁其蕭蕭耳生平身名母子區區遠託聖賢近託足
下何由促膝吐此言懷六月二日道周頓首

與朱節菴書

節菴姻翁道遠音稀殊勞懷想也別後其欲歸棲遲於此遂復孟浪從人作兒童之事今已如此悔不可言
想兄丈徐觀一二年然後擇飛利見免此目前危疑之苦爲樂無方嚮出場時人人欲歸既場後平復相安

無事燕雀之識大率如此今漕河已涸流賊日多消消不塞勢已襄陵當道諸賢總無有商量此事者不狂不狃世上定無佳人兩日以來物情大變白馬之禍恐復生於今日邊鎮大臣不吐不下中閣執命勢不能及糧絕於河餽匱於庾思東門之外青果乾蝦真如麟鳳之脯矣止爲一日浪浪從人取此二年日月煩悶耳

答何元子書

別後奉手教得領易旨自非先生誰復憫其顛頓曲示繡引者生素疏迂晚益忽忽不能多著往謔推探真義二十年來仰鑽義文一無所得每誦程河南傳序輒自興慨恐終窒於辭理也微言久絕天命先生總其條貫使羣儒裹帶有所領袖從來作者得其冠冕昔鄧汝極作訓自命爲翼迫於尼尊今先生作翼又名爲詒遠實逾於當陽矣中間采妙言斷辭要非王鄭之所希及至若洩渤附於山火隻言片羽頡頏殊前都自思其白頭實無關於至理也周自焚視以來日就頑鈍又見書極少心眼不開少年常恨性靈不慧老來又苦學問無多不知捨此兩者更何處得到頭田地如要實落工夫從兩漢上泝杏壇猶齊魯之於燕市比於驚城較近萬里矣每想先生坐開寶藏間出半珠遇其得意真使紫陽諸公向門乞火如周者又何處獲其七箸乎遠環前實浪譚當塗所謂虛誕詠業又滋罪案知已所當瘞藏先生念其藍縷并覆露漿已爲厚幸奈何脩禿人之文纏纏渾沌以蛾眉乎吾鄉銅海困於紅巨上下嗚嗚仰彼鳴音孤兔餘生見人艸伏時有知舊惠書一切以筆冢謝之獨於先生體然絕塵誦其書而嚶嚶鳴疑自以爲不敢也艸艸布復并無敢候達者想自以情法之表廣編善類也

與何元子書

洪思曰蓋出
往戌時所作也

藉庇姻翁得開一面猶以禦魅周此餘年誦候人之詩歌擊鼓之章未免慙其維味歎此南行也票意在嶺西而典午竟置之酉陽勾漏奇緣湘沅足樂從此便道似可省家而東風沂流西上武昌不以爲遠一以畏此簡書一以消此睥睨白首長征知骨肉之所興念也去秋聖主傳問念臺之清壯其之博以此開示給屏無有應者閱數日銓部乃以銓貳副念臺元正上傳平師以爲可用亦無應者宜興乃尋以復官得請日月自是光華煙雲饒有籠絡某幸邀解網而雷霆餘音號號愁人去之經春猶有厲色不知此流復當何極也日者寬大漸開言路稍振起廢之旨再申請獄之音復見海內嗚嗚頌功陽羨實自聖主本懷非盡補煉之庖廚懸命何獨五溪有此毒霧乎天下推轂東翁亦爲丹霞壯采漏溢之餘更爲得一吐氣天誅武陵帝殛韓城吾輩蕭然俛仰無負富有日新豈必繫於鼎足乎已南行亟當趨候杖履而啓處未遑情爲誼奪想親翁諒之蚤也三月朔後一日揚州解纜弟道周頓首

答夏彞仲書

彞仲別後杳然亦以主恩未報空山難臥而奇窮創出無一日得離牀蓐而顛墜傾覆隨之去臘試步江東失足懸崖輾轉三十仞遠邇觀者咸云蓋粉適借兄庇正墜石灰窠中頂踵粗存而百節俱痛從此不樂問人間之事矣生平擇地急病讓夷而太行孟門隨地湧出去秋逃聽不知長安動靜亦復云何僕生平無競而吹聲未絕就陰滅影古人所師安能從軟香塵中辯洩渤之氣乎知險知阻不出易簡之中多懼多凶亦在譽功之內唯有遜世聖人便宜太過今日使人悟嘉肥之晚也前疏奉旨後宜再請以道途遠闊敝鄉土

寇縱橫不能應時而發恐當道以爲僂蹇今既手足拘攣動止不便安能以三折之臂謬附良醫乎長安聲息固非野史所敢問亦有老人所不可不知者瓊公幸稍示之外附孝經大傳洪範明義二部不盡言懷正月穀日道周頓首

答陳相公書

洪思日甲申正月
在墓下乞休時也

去歲八月得拜閣下書欣慰不可言又得召對恭紀所推許誘掖非所敢望起枯迴生遠邇同歎以昭聖德傳之無窮非爲道周七尺斷溝朽株而已漳南天末魚雁不通自去歲秋前隔於秋後撓於寇警道周居空山與狐兔同穴雖奉溫綸近一歲皆不可聞知每遣一使動須經年發一空函頭髮爲白去秋後又聞禁嚴拜疏遭廻而反今遂三年矣獻臘祖道出江東偶臨層崖持杯失足顛墜二十餘仞之下遠近聚觀以爲必無生理藉閣下之靈神力所護正當石灰中不成齏粉而左腕左足百節酸痛以杉樵夾之逾月尙未能痊生命奇窮幸脫鼎鑊之下又羅溝壑之中皆干死而一生人理所不經涉諺云鬼神不護違時之身君相難造窮人之命豈其然乎匹夫納溝阿衡所歎以不肖顛頓如此宜亦有道仁人之所垂憫也方今豺狼載道豫楚秦蜀全藉鞏持至於敵鄉浸成焦爛歲月而後恐與江漢同波道周但仰抱松楸俯共餘黎號呼穹蒼稽首出血於斗極之下而已區區隻身無須他物但乞餘生得守丘墓而體受全歸未投魑魅之域皆相君之賜也萬里聞禁僅抵空函統惟覆蓋不悉瞻依道周頓首

答陳太史書

洪思日癸未
墓下乞休時

分榻以來遂五載此日在沙塵中無一日明淨終風之詩誦之潸然墓下未嘗見報時從諸生知其影響徒使頭髮朝夕自白耳兩歲前兄有書勸其栖遲不圖巨鱗困於香餌鴻寶雲儀又逢輕繳魑魅喜人過亦遂至此古人所以抱膝而歎也有鄒趙而開楊左之禍有文何而開陳鄭之憂安知賢者固不利人國乎每讀子瞻寄錢道人詩爲之中夜起而頓足卽不能負劍開槩以滌豫荆使吾黨發其醜顏亦奈何手扶鼎耳坐觀鸞孔雜於鴨臚乎嘉善想亦歸天下蒼生竟當活於誰手明明天子不信詩書之效此數十年來講筵諸臣不得不任其過次乃邊圉諸臣耳一病當身百藥坐盡洩渤登筵則參苓灰死矣兄此時視僕猶有起色者乎墓下蒸濕腰膝大痛每值風雨輒酸楚不勝自去歲承命半載矣作一艸請告未能悠悠此情非傲非情誰復知之者五月十日燈下道周復

答賴太史書

洪思日甲申
墓下乞休時

字兄蹈古之懷與匡時相資使聖明鑒其真醇友朋諒其惻素信獲之道可謂兼之每念曩時唯有興歎吾道屯亨雖係之天亦由乎人居平疎略簡核不細涉學淺陋其用睹矣僕既局戶以俟追討曾不移時世事如是溝壑殘年誠不惜死所惜者與三季諸賢同歸覆轍耳雨雪雖消淖泥猶故塵霾四海無日清除兄方射隼高墉如使天欲治平王明并受則岡鳴梧音在兄赤鳥之下矣蔣八翁一再貽書皆不敢答自安腐朽不問星辰凡諸邸報海內動靜一切付之飄風落葉耳小詩附去足抒微思洪範緇衣坊記三書請正謝無量二月七日道周頓首

答朱王孫書

洪思曰癸未
墓下乞休時

老公祖植根天潢洄酌行潦施其珠玉挹此葑菲信艸野之耿光亦人倫之勝事也承示寶乘甚謝凡貞白著操當身皆不自知而傍觀者爲之贊揚稱道猶頌柱蠹於蓼蟲之前諛松筠於泉石之下無所動其感憤發其言笑也聞旣漢山川之奇萃於國會是以人文聿興貞良復出江南名山足跡欲滿恨未嘗探金精之隱棲訪麻姑之逸躡耳僕去楚歸遘疾虐右足偏痿又住墓下卑濕自五月以來遂不能踰戶唯右手尙動勉供酬應過此亦恐不能如前近又惡聞人聲已四五十日徹夜不寐以此盡屏思慮轉面暗壁教至不敢不答力疾鳴謝不悉所懷

答陳御史書

洪思曰癸未
墓下乞休時

匡扶之業須藉偉人鐘鼎之勳全資名世當此海內焦乾衡嵩板蕩願諸書生袖手無一籌一畫能紆明主之憂釋蒼生之負者乃知士市魚鹽之爲絕德也先生應時而起上眷獨深攬轡奉帷澄清萬里其於撥亂支傾憂盛明危之略嘗之熟矣僕溝中之瘠泥蛆餘生俯仰上下流覽古今未有迂枯顛頓不自隕絕尙苟且蒙面有如僕今日者幸得藉桑梓餘陰儉賢宰執之庇俾保首領終老牖下已爲過矣豈敢復盼澗池之收起病類以辱廡乘乎去冬兩疏雖奉溫綸而天末雁稀邸報不至傳者紛紛夏秋之間猶云迷誤致駁爲談者之所鄙笑至八月家僮始歸乃覩顛未九月欲脩小疏堅乞休致而家貧僕劣逼求急足無肯應者欲託當道代題而枯腐餘年往來絕寡又云從無此例亦已矣折臂螳螂何干轍迹乾頤蛙蠃無意鼓吹朝家即不以廉恥待人臣子亦當以廉恥自厲先生方秉貞論正色朝端當博求練達之才以削平寇讎匡我王

國如周者委葛寒暑之不能謀安能投袂應節徵聲而赴會乎聖天子仁覆遐陬羣公恩及輒類得以狐兔餘息歸首丘隴拜賜多矣里門嘯聚日以益繁墓下廬居豺虎所嗥每望松楸徒有悲涕此時猶談出山眞情理所不至倫類所未許也欲艸小疏附上復以迂疎自輟知託華廈者不變色於召風也長至後一日道周頓首

杖後與甘御史書

負愚山居謝絕人事誠虞有不測之威被於艸莽而風霆陡發掩耳莫及親翁驅車俯唁而某以擔簦就道西度漳關矣夏中三輔進去時兆欲清而長壽發機界予於毒明廷召對詹翰四十餘人無發聲者覆盆之冤遂不可解今雖韓城禍敗勢共推頹而朝事日殊要非盛時之所宜有也楚寇爛於秦蜀獻賊已入漢中又出破成都聖主赫然爲誅熊督逮邵撫終未有益於殿最者大厦將傾東蒿作棟微親翁誰爲支其隆棟乎某病七十日瘡面稍平猶未能行立欲俟百日自發一疏而談者謂某罪狀盡在御前不須自白四顧親朋寥落晨星無相及者要當寂然聽之元穆耳嘉惠悉當奉璧頃當再報不盡

答吳源長少參書

洪思曰癸未
墓下乞休時

天下之可恥者二無功而享大奉不教而視傾危此兩者時論不過寤夢亦不過易之所謂吝也可歎者二機失而不可收時過而不可謀此兩者進退無地嗟悼莫及易之所謂悔也悔吝當中人鬼共咎雖有高官大爵猶黏蚌殼於巖石之上積厚薪於曲突之間豈足爲君子所過問有道所侈談乎祖臺下車而逢寇攘黎獻洵指顧之間疆渠執醜原隰既平泉流既清乃絕口讓功退居樹後而手執魁柄者低昂其間奪我

慈父置於遐方亦彘影所不吝四顧而無悔也今苞孽未消將復尋其斧斨加以殄滅亦非有道所樂談君子所再問也祖台家有竹林巾車孤舟出門臨江無所不樂即不然一度嶺觀西粵之奇峯然後夸猶以望旂常於吾黨所瞻依先人所期可亦未甚遠也僕病人也自五月以來足不出戶限日食三錢梔子豈可通書到長安而并研書未復欲再乞休致免諸是非承來教云云則亦如楓落梧飄無言自化耳讀書五十年樹劍山刀無所不歷安能復商默語之事見石獅眼而移家者後也南中諸友如葉瞻山詹月如去歲流殍藉其支持今年鄉關并資扞擄如此事業賢於宰輔遠矣張司馬澹虛當急難時周郵家人踰於骨肉晤時幸寄謝謝各附兩扇頭去蕭條四壁無物可將想諸老亦能諒之也石城諸兄無由汎寄不任思存十月十一日道周頓首

與吳少參書

洪思曰答吳嘉謨書
與泉道黃子門人

承慈誨及示邸報知垂念深至及憫世之深周今已矣雖康途砥平無復策蹇之處幸爲狐兔歸命丘隴他又何知焉中和建極此義雖迂實亦棄之不得四方艱難人才垂盡何者可紆當宁之憤詩云謀臧不從不臧復用天下遂乏臧謀者乎巴縣恐是首揆接引欲肩樞輔之任世道傾危庸功難奏縣竹之業禪於蜀南債轅折軸乃有鞏其後者如今日即不巴縣安可下手也山陰以闕迂見放猶臣子所安古云無不是底父母天下毒痛如此豈賢人完穩之日也生逢不辰當此際矣往歲出山濡滯清源與曾二雲揚扈於上蔣若柳爾述於下倏忽八載唯有感歎今四海凋瘵非芻蕘禮樂之秋也前表艸率急就殊不可觀若再書便當改作泉中多佳書尙遲日脩飾以進謝謝不勝上己日道周頓首

與張滿虛中丞書

壬午二月別兄於雙荷庵爾時筮魂未與顧影驚竝遠望長途慨其歎矣十月九江始聞環命栖遲江渚侵臘抵家入門拭淚乃知兄垂念之殷所以周生備死雖割宅分哺不以爲過長安諸老每談兄至性發於匪夷揮涕感哀無言不疾以蟻螟微生菌枯共盡而使長者發其精誠賢人生其悲宅即起骨還因不爲遠矣海表孤生四顧無徒知己一人自以爲足比雖屢荷趨命而折摺之軀形神不屬淒風苦雨酸楚莫勝橫艸枕戈之意入老已衰補過蓋愆之情捫心俱絕譬之豚魚脫庖墜波又焉能念主人之夕冷上客之朝饌乎今日度非中立起於淮蔡希文出於延安朝搢獻頭暮誠闕首必無以上慰主心少平神憤吾儕艸野量腹度形一石一松受恩已極開濟之業匪我仁兄又誰望乎區區之情聊寄小詩空函附致曷悉勞馳十月十一日道周頓首

答蕭中丞書

洪思曰壬午
墓下乞休時

老祖臺垂念深至自往歲問關而後被覆彌宏情誼加篤馮鄴兄零旋於中老祖臺扶植於外是以獲起白骨再飭毛羽轉瀟湘之餘生從狐兔於丘首也今春得荷解澤即已謝人事不睹邸報不接書問不近縉紳誓與魚蝦鹿豕爲伍知老祖臺於符檄交馳時亦想松濤雲樹鶯簧吹之爲樂也勳名自天鐘鼎由命周已矣萬死一生脫於時賢之手中夜拊心尤悔叢集爲遠媿古人上慙明主耳泰運未回尙勤宵旰口寇將合羣穀寒心所謂騏驎服之解腕秦越望而卻步者閩南疥癬無當痛痒而當事引爲瑕疵過矣過矣周以黔婁之骨附林類之皮苟免朝夕爲願已奢墓前數瓦爲風雷所碎今藉若柳諸老當務親賢方將寤夢以

求管蕭入山而蒐頰牧寧當瀟舉親朋相爲唇舌於老祖台之前乎閏月十九日倪鴻兄聞已提旅入援吾鄉與嶺表遂絕無衣之篇此非艸野之所敢問然使元黃見血魚鳥安棲亦漱流枕石者所望而顛倒也聞海宴清天鑒自朗蛙蟲小閑何礙風雲謹致加餐謝謝無量臘月道周頓首

與沈令書

黃子門人

湖上山中雖不及晤然知是兄相念之至歸詢家中乃知辛已承遠惠不以生死攜志比從漳平父母處拜兄書知日將莅三山以是兄澹寧攻苦如此尙以禮樂丹黃藻飾斷溝不已過乎中原淪喪玉石共焚兄乃得保球琳徐收桑榆之照非天祐尙賢神司報善不至此僕病創已極又在墓下水濕下體酸痛倚筇不能出戶緬思曩日與二三兄弟探陰壑陟危下呼樹隱豹上捫飛鳥今遂拳然伏枕成隔世之事矣敝里南靖詔安皆蚤晚望得好人布其愷澤雖盜賊漸繁而耘鋤可及能得廉平如兄者洵酌所由歌也頃當晤沈公祖必有一當以報蒼生亦吾徒之福也謹附謝謝三月二日道周頓首

答張恭錫書

洪思曰名晉徵字恭錫黃子門人癸未子在墓下乞休時

垂翼食報貽之上蒼收於吉人總非言語所罄要知敬緝使神聽分其和平耳去歲入西陵時承諸兄所顧念匪朝伊夕亦難消受僕以疏率之身享此綢繆常恐譽過咎生元澹之中錄其疵累也世道悲皇人才枯竭口口之禍一遂至此今當四海憔悴之時得一身榮暢動作如願則不謂身與世繫道與命關者矣江嶺上下風鶴不搖衣冠翱翔無異曩日而僕既折其體膚備諸荼苦如此乖違又不在山川之限今雖倚能起眠食如故而血氣既衰神明棄舍得荷主恩守此廬次使松鹿不犯烏兔相依自爲過矣寧復俯道與達

人往來而進有乞音退生懸色哉天下相知實少沒在地下猶得與奚向動問豹婿周旋真無意人世之事也便當更悉以俟來鴻謝謝五月望日道周頓首

與沈令書

洪思曰癸未墓下乞休時

父母制令者也子弟奉令者也如田賦之法不失古意欲行則行之誰敢柄鑿齟齬者紛紛所云深用戒心然丘隴在此無所避之溝壑餘年誠恐不得堅臥爲執事憂如得松楸無恙枕漱不驚寧非厚福僕區區守墓於世上事不得仰攀唯見從來兵革倥傯時士民紳弁多有詬誶亦時勢使然物情難怪閭巷間有不相諒者亦當以強忍持之即云僕不養兵不與人勦議事無損也邇臺精心密運造福無窮寬綽調度與諸老商度應變多方如僕酸腐但藉覆幬不至展轉足矣地方多故不一晤鄉里先生而數以空函煩執事亦理路未妥幸謝謝諸鄉里先生云眞病眞暗聾者勿與人事也

答張御史書

洪思曰蓋張若仲字次楷與兄若化蓋皆黃子門人後退居丹山之陰海內謂之二張癸未子在北山時

往在都下未有以報也抵家不數月龍問隆施又儼然臨之自非骨肉誰復不我遐棄者除前始至墓下入春遂患痺兩足垂攣動借藤筇之力秋來作劇困於牀簀者幾閱月至今蛩然啓免之期恐遂近矣仁兄聲實並茂綢繆陰雨之先使河朔無事太行晏清西顧之所乃瞻也流寇聲息比復何如居圍驛驛吾徒不得不任其責僕幸得脫然保有松石一切動靜膠目塞耳惟冀仁兄毅然紆宵衣暮袴之願耳使行艸艸四壁無可致意者唯小詩四章侑以七箸仰祝加餐努力千福七月廿日道周頓首

與張御史書

洪思曰將
出京師時

春間備領盛雅時以纂述經書未遑報章至今耿耿兄才具足了百人不得藉兄聳其鬚眉耳古之有道者不樂以一節自見雖忠孝亦不樂居其名不願有其事今乃不幸破綻於此程伯淳生平不喜孟子蓋虞千莫之多缺折也其實行廢均之有命僕再出山再遭顛頓豈有意爲此歟歟一分便覺道力衰薄無當於用宛鳩小明兩義互發耳兄湛觀遐矚尙不以爲礙也澤蒲相去幾何是皆聖賢之都天下要會前日僕欲至秦蜀取道五台瞰二室一躋華省望終南太白而還今又碌碌與匡廬從事遂使半百之年不知古長安是何方幅可歎也潘蒲州縝密和粹與商關河之業自是蒼生有幸是僕所藉榮施也幸爲謝之南北遼遠鱗羽間稀所相望者唯爲朝廷努力子惠窮民權貴之間唯以至誠格之豚魚有孚何況吾羣僕已艸艸束裝就道空函致上不悉願言

答鄭牧仲書

牧仲先生頃得兄及叔祁兄書使人慙愧欲拔白髮以追青雲之末所稱未墜在茲之業要亦二三兄弟有志之所共獎非周朽腐所敢與聞矣周少無牧仲叔祁之才又無牧仲叔祁之志垂老等於牆面令生蚤數十年與諸礎切嗟攝召今古集於斗極深藏遠待其所成就必有可觀而今已矣即不幸蚤晚卒業風露何敢長揖以見游夏且無論姬孔之前矣王文中造就未宏遭時衰亂然猶奔走上下受書於李育問詩於夏璜考易於關子明正樂於霍汲而周欲以區區單門獨戶坐臻富美不待高賢窺其內淺也孔門諸子各有所長因循增積終於高大而周以梯裨實倉瓦礫補嶽源瀾既雜蛆蚓同游令先數十年與諸兄翱翔開其

眼翼差免諸累耳漢宋諸儒途徑稍分不離博約二路博不墜於詞章約不入於老釋雖使董劉俱墜明堂朱陸同登道岸未爲過也凡人生病痛皆不在博約分途儒墨互分只是割不得利祿二字割得利祿兩字即與姬孔周旋雖不同堂依然隔壁耳洞機是僕十年前之業切不須觀浦中諸兄近日料理孝經洪範差可寓目來書所云春秋訂說必有深義跂予見之數年前亦作此說比於坊記表記中略詳其目臘月亦可登木大抵此道皆不宜刊布近名講論近質但近名之災及於梨棗近質之災及於體膚要使眼見牆壁有無限文字亦不妨與後世質其短長耳謝兄近想佳別後有林衡兄敦實割當文藻斐然未見知於當世兄幸獎勸之甫即多賢留此躍其隱光王長公承惠書見候未能謝之又病久不能扞序千祈謝悉

答曾叔祁書

叔祁先生惠來書惶悚不堪時寒風也披誦之餘幾至汗出周實衰頓顛墜已深秉燭無及思與一世英賢仰鑽斯文是以一再出山蹙躡道路泳游之之未見其人幸有一二俊傑燥濕相就亦不過摘藻揚芬以爲文章廉隅如此而已誠使天下俊傑皆近文章砥礪廉隅入閤不疑蹈險無悔亦於周孔意思領略三分而內鑰於習染外撼於禍患求其博約終始弗畔未之有也周之少也溺於騷雅比其稍長濫於老釋既四十餘乃知文藻之墜華與二氏之落籜一意反於六經然而老矣又性蕩佚易簡不能爲鎮坐靜觀含礫張鐵之事是以興奮無功疑信各半先生起於名家年未三十已登富有之堂探精微之室俯視周輩窮極乃反猶義馭之於雞栖也來書所云漢諸君子殺馬樵蘇以求聞獲蓋其時經書未出師述寡鮮今世典籍盡在坊間秘書枯於册府人自得師家爲明述有執經而遵孫咸之哇買廬以依張饒之室亦人指爲黨阿衆誅其狂惑矣先乘深愧不能闡揚矧望長修早紹前業要之出處各有時候非如道力可一往奏功也敝帚安

可再享豈得當寒表其絺衿乎幸收藏之間有未錄者從諸友乞得本附政小詩附卷頭去竭日呻吟不離
蟪蛄亦騷雅之殘波鉛華之苑積也百維謝謝不罄所懷

與王伯雲書

前後所得伯雲詩幾二十章珠琳火齊滿於屋壁寶盈鬼概宜其窮也病廢既不能作詩又覩青緇而捐兔
册笙簧之下無所容其蛙鼓以犬馬殘年博副憲公佳詠及此十章幾直一死所不敢屬和者非直塵見亦
揆才度質安於固陋相高曠之所涵覆也謝謝二月十日道周頓首

與張公亮書

以僕意爲公亮主人無如陳雪灘者雪灘一榻蕭然但以吾黨集聚筆硯無恙便爲佳况爾正平雖輕薄然
不從苟文若陳長文游亦未爲過傲也

答陳臥子書

洪思曰臥子名子龍華亭人
黃子門人癸未子在北山時

遠使垂念萬里外未忘一日自惟陳陋荒蕪之餘伏枕偷生兄方匡囊居園極蒼生於塗炭慰明主於宵衣
與二三君子渙羣戒萃克詰無違僕亦視中原底清以收泉石之福安敢以鱗羽長途仰累足下哉前得吳
生書知足下相念深至比接沈寧陵教所仰藉宏庇者眞若孩提之於襁褓想足下攬轡澄清之風與隨車
滂沱之澤足相映也文卷清新讀之喜愧交并僕病體已廢兩膝將頽藉筇而起遠視匡雲邈若天上自念
首丘不違先隴得以遺骸近託松楸已爲過矣兄清眞卓朗和而有節廉而不劇朝家倚賴斯道所爲鎮靈
僕既猥落餘波溷人及門諸生出處可見兄善自寶重勿以賤鄙爲念努力報主加餐千萬賜米委不敢拜

而道遠阻脩使人劬勞四壁之間無可爲答謹空函致謝不悉旁皇夏五道周頓首

答陳臥子書

四月拜上已書艸艸未有以報也此間天末眞成醴難近旨如何亦無由見之但聞兩都告急江右調危近
云口已出口果否倪鴻寶馮鄴仙諸老又如何會稽歸而蜀川出此世道當然何足爲怪賢哲完身勞人馳
驚天實變成不爲錯也僕比益病劣左臂偏枯右脇膝痛黃鳴飛鳴眞無復江湖之夢望世稍清平得收擊
壤之樂耳沈天目極明爽留意斯道時相聞幸寄空函書抵千金不爲誕也易象正完幸一册來四月望日
道周謝

獄中答張勗之

勗之天心遂不可問正當颺雪瀟流之期又有風霆辟歷之異雖荼毒發於司馬亦銷鑠積於多時矣陋巷
獨樂顏子所私市上雅春申公未免常恐賢者聞之懈心志士因而輟業也六十日外瘡漸就平輾轉牀簟
未能起立醫者云須百日聊俟之耳犴門之內不勝深山箕文之所留心正可卒業而神爽久衰墓艸繁念
每聞北風亦擁衾以悲吟擲筆而長歎也前刻儒行緇衣深費精物今又不知洪範月令所在四小序艸艸
者幸覓存之以俟來日成仁未殺身著書未絕筆雖敗鳳獵麟未改其樂也聞鄉里捐助者多已敕家人一
一清理分還之

答陳獻可書

獻可先生僕談此道三十年今日乃聞獻可之言也湛心研慮冀一日升周孔之堂灑掃就事爲周孔廁養
耳而獻可過相推信亦若謂當世無知僕如獻可者是僕之所循省浩歎也人讀書不能明悉不能與庸下

之士共爲聽論乃使賢者一視而怪再視而棄終身崖然掩面不視此何所當於居業立誠莫猶有得者乎
獻可獨由精入變不厭煩墮以沂易簡知此道之自然著察所難免尙欲十年卒業於此雖康成季通之用
心豈復過此哉如獻可所云讀之而不能致功名隆聲譽美田宅裕允昆而猶且讀之者此真迂愚吾輩所
當共戒也僕爲此書尙十五卷談治亂之候帝王之紀依本圖象然論之招尤正不如學庸語孟可以釋於
元薰借於大道也吾道所賴託於精心心地一蠱百節俱落世謂覃精其蔽近愚仁而好學何愚之有縱令
昏隋劣於射御但使來世不絕微言朝聞夕死吾猶甘之矣四顧廓然本寧已作穉孝云亡天下悠悠尊公
自爲魯殿繹其緒論鼓吹風雅不足爲多獻可繼之慨然拔身依於聖地仰觀俯察流覽八荒似謂子雲平
子不足兄事而獨留意儻忽之言自非孤身有翼誰復挾其給訝開以日月者乎象林及洞璣式象繆假鄰
光約其曠源猶存火影在僕書中愈分剩義在獻可集上自足孤行皇極圖韻包括宏微自祝鈐所未窺沙
隨所轍記僕自早歲亦嘗討論然在聲塵之間亦與博依俱謝矣堯夫拈韻極爲整齊夾深審聲徒來世詬
苟可答於神明併可遺其胼蠶也來教云欲以今冬了授時圖此道極是中要近人欲舍授時遠依冲之分
杪愈闊施用實難僕所積分在前書中僅表其一尙五六卷在軒箕圖中大約易象一十八變推五百一十
四年分毫杪忽交會食差如晴日矣既了授時再洞前書推算六十年中交會食差亦可不謬但以周孔
爲師父象爲準諸紛紛者如聚僮僕料理米鹽善成而收之綱領不在也古今讀書如劉子駿僧一行都有
意思但不能精微堯夫初未嘗作厥元晦云堯夫作萬分厥行之苦難此殊疎忽無有也舉業得喪別自由
天孟夫子云求之有道得之有命是求無益於得也僕自十九歲結束山裝初無當歲之慮碌碌知命出處
之數併不繫心駢枝諸作亦在夙年終蒙世詬比盡脫落文章性命浩然冰釋所不自了祇謂發憤仰思忘

憂忘老決不敢坦然安奉佛老之道耳吾徒心性端倪克治淨時與釋老不別所大差殊祇有此事範圍曲
成不厭不倦死而後已知獻可眞成厲精上達亦意天下舍獻可無可與語及此者前書暑律中尙爲刻者
誤移一宮又暑分實測未定故不復寄此道得其大原了無艱澁悟積非積知變爲常一歸於天吾與獻可
勉之更冀有得別證所聞道周臘月頓首

答洪尊光書

洪思曰黃子臥病京師時之所作也丁丑五月附劉完公郵中歸

尊光兄遠別了無可致意唯念間關爲僕作苦嚶鳴之誼深於丘隅矣小艸不可爲一木未能支回顧當時
千九百悔南安翁蘇雲卿果是畸人讀書千卷不如翫易二爻是之謂也兩得書殊增契闊此間矮屋如駕
漏舟棲遲半載欲歸不得擬上三四疏又以道命自裁袋口而止吾黨讀書豈希孔籙便使朝廷不得其用
鄒志完陳瑩中眞成日月也早中偶爲兩尙書請命僅得一司寇此自天子殊恩過此便有馮婦之嘲然自
忍耐不得冀秋間得歸杖履相從聽新詩及諸親朋晤話何所不樂安能以身日嘗鼎鑊邪場前絕無彼信
迫於衆議屈曲充數如祭芻狗行蹠之矣端午前後病極困劉完公欲行留多日不可得以此不及致諸兄
書病前分扇六把附去病中腕痛不盡云云

與洪尊光編問業修業書甲戌

獻歲拜手教今兩月矣未獲報章唐伯玉行又未過從遂睽言候此時日事春鍾料理墓下筆硯之務幾成
河漢去歲修業皆未能點定又坐風雨中抱膝仰屋藉尊光略爲點定便經平子矣如周此月決未清緒諸
生來訂花朝之會甚切尊光幸爲諸兄道悉鄙懷謝前戴眉仲所錄出問業一卷已忘之矣尊光暇日可

發古今疑義或一二十條爲問業補作六卷冀足之使得成片段耳亦佳事也

與洪尊光編修業問業書乙亥

二月得徐晉斌唐伯玉書始知尊光有棘人之痛言念愴然此段是讀書第一苦情在罔極中撫膺共悼也僕日負土作不了事前欲屬兄點定脩業今不敢相煩大抵亦不須更易耳遲數日當秉燭了之聞兄柴毀幸善自寬僕自喪二人後未常以誕日近饋粥今年勉而對客亦自不得不爾尊光其節哀立身揚名顯親則自有日如尊光者撰述卓然已自不負宛鳩僕何敢責其原菽乎小詩浪登絹素并小紙焚之知北橋先生總帷之上颯然神肯也尊光苦由唯自寬清明日道周頓首

與洪尊光編修業問業書丙子

還山矣爲親朋強至海下今又欲至天寶卜兆遂不能一一候諸同志唯尊光道悉之也榕壇姓氏末行宜補云計問業三百六十五條十二萬一千七百二十四字日來紬繹蔣若柳序及拜高致便當坐臥其下矣步之殊不當下里艸艸附上用佐茶政耳山居方費眷鍾未遑趨謝冀與四伯道其謝意前諸生索一汪父母序僕至今茫然未有以應也又方有眷鍾之務幸假尊光餘力使僕蒙虎之皮良爲厚幸矣修業序已寄張勗之處統俟鑒別

與洪尊光書

方與諸兄鼓棹江東尊光能往觀之乎想爾楫遲於南浦也道周頓首

又

數日從軍旅中來見新學乃得開眸也從二經精之聖人天道堂室若構十七元起辛未是表正之本兄遂

坐而致之昨表記末尙未說出今坦然盡矣日軌月軌陽節陰節俱從此出世間祇有此真正學問不然虛度一生也其分秒便是損益進退三限五際三垣九野之所出入登雲漢而望星辰猶涉海之觀島嶼耳道周頓首

答洪尊光山居書凡四

知尊光山居甚善春深得無蒸濕乎拜新詩如領松風也僕亦發籃輿來山阿月上得元對耳兄於此興復不淺諸峰之頂四眺極目良散人懷十七日道周謝

又

以尊光遠器而當昌時遽其離騷乎空山了無所覩比來熟兄離騷乃稍稍開眼始知屈左徒之外別有一段情深理至之言宋西鄰輩祇可爲兄作奴也僕樂棘之音久已焚卻日在墓下一意灰槁以蚯蚓爲師每值秋風空對長松揮其酸涕耳道周頓首

又

見報病益甚口口重飛大爲心痛正賴二祖功德未艾耳僕讀書五十年飢寒不死今多可十年飽煖何用鼓院紙錢宋人所爲歎也一官如落葉今以但鷓鴣鳥視之來去不復經懷

又

接書殊爲憮然賈公深有意於斯文能相推轂必使尊光出山亦自盛事不知此事竟可行不此事始於宋家亦行得去然曠徑多則營求衆非所以爲治也兄之委去足見深退矣賈公有晤煩爲言謝不盡

黃漳浦集卷十九

書

答紀石青書

洪思曰壬午十月
月在途中時

廣史焦書尙未及讀也旅次忽忽諺所謂走馬看寶山了不知其巔背也病餘已絕意人事行李蕭然惟數卷書寄頓吳越者今悉攜歸爲終老枕藉之計惟望達人早據禹鼎以刊魑魅使天下廓然睹吾道之大欣望不勝

與紀石青書癸未四月

石青兄掉臂獨行千古東魯西羌無復匹者寧復於筆墨尋緣乎文章於人如華著樹煙霞著天能於此處不黏心眼則幾於道矣飛菟遊行要遇萬里不逐日月未有倦時僕如石蟹臥蠶已經罡風無復動理但且置此坐臥其下需兄二三十年耳以兄才識自漢唐而下皆非安頓地位切勿露些子意思明河在天如絮如練隨人比方總不得畫樣也

與紀石青書

二書皆當服膺每爲見者擲去如火齊木難自非剖腹不易藏矣江東四詩通郡之所傳誦山猶未肯林念之愴然常恐愁怨歸於猿鶴今春王月已齋疏乞休從此可保免於移文又得台兄稍憇六月得一言一韻逾於百朋之錫溝壑餘奉未爲不奢也神物久當自合世論悠悠安知其故絲劍蕉梭入指入腹自非蠅

之所能及小出遲回決不得形之恠條也欲爲兄序躊躇未能僅附一小詩去迅筆起艸得於筮頭極不能佳多爲對榻明心之義冀覽者不至河漢也

與紀石青書癸未十月

石青兄知兄初抵家輒以周爲念宇宙內人事關情者自多而興懷及於枯朽爲人鬼之所共妒似今有所不可也墜崖後魂魄稍蘇復歸浦而籃輿寒風殊覺不耐聞兄書至亟裹被讀之至前後駢集五章勝於七發而左臂偏枯百體未甚平復雖欲勉力奉報悉其悃欵無由也兄情至必諒我形神之表

與唐伯玉書

洪思曰蓋庚辰十月在北寺時猶未過西原也

伯玉兄握別江渚感動都邑使豺虎見而遜心魚鳥因之變色蓋自紫陽西山以來無此踪跡亦幸當盛時不相鈞引耳過此唯彭達生左右於前涂德公周旋於後江淮風氣壯此兩君維揚諸生亦可數百灑涕江水自揣迂愚繆干物網不圖尙信於朋友入都解檻又日見時事乖虞幾同龍比之夢近聞天子諒其迂儒朝廷哀其重創而子春之足亦已慙於有道矣幸以著書未絕筆留此餘年儻西庫久羈或可成典謨政官禹貢呂刑坊記表記與洪範儒行月令緇衣爲十書以俟來者耳諸唯努力加餐相念道周伏枕頓首

答魏秉德書

前得惠教於令兄裝中欣慰殊常僕當倥傯出山時惟兄相念薑桂之氣於今盈把天下萬識卓行之士宜無踰兄者仰湖高岑絕澗鳥飛往還晨夕念之深以爲歎方今世表經緯可觀者劉完公魏秉德兩人而已令兄還艸艸不託迴雁惆悵如何僕終年爲廁鬼所苦在長安中閉門深於幽谷今復作小書生再翻傳注

雖乘冬寫經不以爲勞年過五十無一言可告天下恐過此無所復進矣焦桐數峰之間何日再容清嘯當作小舟與兄共刺其下但兄方持世爲中厨搏火何能一日從我鷗羣乎洪尊光才器識行吾黨所稀忽有汪父母書從何予子王君衡處索之不審何事幸出謝父母也唯武城能容滅明亦唯滅明能容武城吾輩讀書世事日非付之柱口未爲損也令兄幸爲德惠其間謝謝不悉

答姚有僕書

拜書知兄將入都門深慰於心僕老憊已極無復它慮但願安臥林壑耳自季夏以來敵鄉盜賊蜂起時時焚掠去墓下不過一二里雖知僕貧苦不相過問而逃難餘黎時復寄栖四壁蟪蛄相依爲命家無擔石措手無處又不能僦屋城市遠離松楸生值此時雖以貧饑爲福而赤手蕭然不成一事迺知蒼華魚魯未爲勞瘁也衰病之中不堪此趣使來值賊稍退聊簡筆墨中實怍怔不能復問字內動靜矣前鴻寶書附致想於吾兄極爲注念不煩丁寧凡交情不能骨肉但以骨肉處之無不盡者僕苦貧臨難始覺雖鄉閭未能見諒再不敢通都下一語二鐫章寄上鴻寶晤時道衰憊達亂後無復入世之意耳

答曹遠思書壬午

斷溝餘質不圖復遇匠石抵里以來再承干旌自擬薰露波濯以觀函丈而請章未下席藁在懸狐兔之性見人輒伏誼不敢以黃冠皂衣干冒輔馭想祖臺諒之早也還山備詢家中知所覆被咸至春風扇物不屏枯條朗月經天遍臨寒壑彼姝之詩衛人所爲發興也比知畿南不靖小疏想未得達強勉櫛沐以冀躋公而祖臺方入三山夜瞻斗柄北望缺然以海內鉅碩雅負經濟爲吾道岱華如祖臺者所宜朝焉候塵夕焉擁篲而願幸於微文嘖嘖次且豈所謂知雋傑而識時務者乎荷罪如何願言孔多盛貺藉手以致稱觥

之祝春禧介集無任瞻依臘月晦日道周頓首

答曹遠思書

暑中瞻望忽焉寒侵再接惠音粲於荷菊言懷千里愜於躋公而蒲柳涉冬支離日甚祇望旌旆不獲將迎眷眷之情復何已極承示世務久不聞知大抵服藥違和則暴怒易生更醫未效則燥心愈長誠得中原廓清盜賊殄滅雖賡颺喜起與釣魚賞花未爲絕望也堯舜稱知人孟子稱知務知人知務上下俱不著力則治亂泰否全仗彼蒼耳盜賊興衰亦有氣運從未敢以此咎之茂宰此物有種已二十年誰能旦暮絕其根株周亦狐兔餘年四顧風濤未全到岸日夜訓討臨谷履冰賴當道諸知已鑒其夙心耳情想理遺輔嗣所珍無辯不爭仲淹自貴又安能以大路與柴車競逐乎嚮承賜江東講堂資深非所宜已約諸生還謝恨在伏枕未能造陳要以此時藏身藕孔猶患不密決不宜復與黃口率場共鬧也平人不知如何海外孤生根基大薄每念同氣爲之浩然彛仲亦去就杳然此時得還山苕霽之下爲樂方多支天不祥哲人所忌況其下者乎周病日委頓非有假託月前欲遣一僕乞休而萬里朔風意無動者亦當僵臥聽其銷除耳謝謝十月十一日道周頓首

答曹遠思書

甲申六月十二日

勤王與固圍同義今日唯固圍爲難耳夏秋之間呼庚不至伏莽將興漳南閭巷豈有寧宇即如提兵亦無要著欲進留都則情勢見嫌欲站京口則聲實俱絀當机阻而措安步藉勸進以蹈危機亦君子之所詳審也留都諸賢相機不決規模未有可觀此時監國已四十餘日未有專檄徵兵討賊亦未有專檄收天下士民之心而因循塗飾若太平盛時貪天偷陰不知所極猶幸祖臺不與之共事也僕老矣墜肉自噉折臂自

蘇決不能與劉隗刁協爭縱橫之路昨日所云如前星入海諸將克復皆諛聞粗慰羣心非其實也譬食苦者聞酸聊復解頰耳

答李元仲書

勞使遠來媿無以答憮念也前剡徒足以辱高賢世無山公即啓事可廢也此來艸艸豈有閉戶顏回與禹稷爭道之理今聊吾責耳宅險運奇不如居平而無爲正爲無爲不得投身險運於尋常茶飯無有分別惟吾兄念之耳隻手出門空拳欲反不宜令韻人譏其老革也楊遂菴行邊爲劉文毅所不禮葺宏支周爲女叔寬所譏念此有如芒刺目下遽欲乞歸亦惟兄教之耳八公蚤晚到此是吾脫手之日也八月二十七日道周頓首

答孟長民書

長民前書未及報謝不圖宇宙板蕩至此東南半壁尙可支持則福廣保障均在尹鐸矣使者深頌政事如所云催科讞斷得其要領不煩而治益此無倦通於神明矣此間去天亦且萬里自五月十五日鍾陵立國以來亦且六十日渙號未布中外皇皇不知中朝諸公作何舉止既不徵兵討賊又無以大收臣民之心或云行人未備而綱領條貫猶之濼艸視興元詔書相去霄壤矣漁陽諸帥與闖賊鬪猶懷光之於朱泚而淮陽諸帥沿江挾幾如行瑜茂貞之流恐建武建炎事業亦不易就也世界行當底平中朝無復用人之意江南異論不得消融進取規模了無勝著大家喁喁看十日內不見消息則桃蟲拚飛不復可支唯當收拾殘葦與斧柯共爛耳使來安海必有所聞如在北山亦與天南同聽了不得真實也諸唯寶重下車輒有頒賚無乃不節聊此便謝不悉

答塔牧游書

牧游先生相念教至憶在羈庫兩拜稟體今一出此關而宇宙崩頽仰視北闕慨其歎矣黍離下泉綴於篇章殊不忍讀諸君子亦抱頭隕膝甘心寇庭禮樂名教乖離至此實誰為之見先生所撰蔡江門傳差為桑梓表其眉毛也楚中死事者想亦殊多吾友蕭雲濤在鍾祥結纓亦凜然可敬唯敝鄉陳瓊在長沙不知下落耳今方舍垢之時中朝有意滄諸惶汗不知茂宏所云網漏吞舟竟屬何意也此間去鍾陵不遠而日邊音信常踰月不通百姓嗚嗚若長夜之待旦周又苦病不能一問烏龍之津四鎮兩江風景何似當與先生共勞寤夢也蔣八公已入都看其振頓別有心手否則使人掩卷於建炎之下矣篤信好學是吾輩本色諸老量大動云聖人趨時不知趨時後寒暑星霜更是何物悠悠宇宙求一顧榮賀循未可得安問江左夷吾乎正賴太祖多靈開贊諸賢宣其心力使范宣沈麟士得保遺體枚淚松楸之陰為賜無極耳武漢蕪黃終須設兩節鉞對江相望以為建康第一面障過此乃談江皖不知邇來措置復何如晉吳有置多在濡須太元以下多在江州今日蕪黃為復郢之要會願先生悉計圖之也四帥動靜近如何中州長安并無音耗使人悶極再覽子春下堂之篇不覺頽然為輟筆也使行甚迅艸艸附馳謝謝

答尹民興書

見台教令人增新亭之淚今海岳傾頽持繡斧亦將何之何休寧徐發源各拔翅入關不一得晤亦成何業汪我生賢者乃心從之為奔林之鹿是不肖所為浩歎也今日事體不用徵人無以收拾舊物用徵人又無以別其隱隱正須兄翁及徐何諸君為之章聞撫循暗中著眼使賢者得其用奸人無所伏而逝焉去我何處得有樂國不肖之用不過如雞鳴中夜膠然令人曉了耳至其起不起非所敢知也前疏亦備為推轂即

今日料理上江舍先生何往者蔣八老屢稱尹宣子好人昨見令弟及趙生亦肅然起敬苦留之亦不得天下事非不肖一家而獨使蹇驢服此鹽車薄暮疾驅於何底舍度其心願不過看一頭路供其撫掌耳世上可笑甚多何必老萊之屬彭雪襟心膽高萬幸為致意謝謝

與柯司李書

洪恩曰名元芳字楚衡嘉善人烈皇丁丑成進士出於黃子之門人沈簡討延嘉之門來見子目之曰其視端君子也授建寧推官時閩中多盜頗有平賊功治行皆有聲迹壬午秋試房考與焉聞中得先子卷極為歎賞將首薦而後以策中頗談時政不敢進竟置之後先子以入武夷道出富沙因往問之亦相對嗟歎而已亦不甚言所以也留數日別去先子行時因附書來起居山黃子答之甲申先子侍黃子偕鄭牧仲林守一李元仲林君若入武夷時訪之已報最行矣聞其歸囊蕭然不攜一物歸己見南都政在貴陽諸事小遂無復仕意奉母躬耕隱居郊野者十有餘年優游以老其人仁孝廉潔與人交久而敬濟而可親杜門不事生產戊戌二月卒所著書有言孝十卷訓儉二卷雙脩錄四卷初舉進士時得父書心動曰非父手書必病矣請急馳歸父果病篤踰月而歿入以為

遠託宇下側聆惠風每於洪尊光處被服德雅也尊光與僕二十年相從談憤樂之業一泉一石徜徉共之吾黨比之蔡西山荆璞之光終為鎮寶須當老公祖發其塵燄耳然知遇亦有神明以尊光之學行器識靜深如此既遭逢水鑑猶未展其須眉是古人之所愴然興歎耳

與徐孝廉書

九翁兄丈駕至不能遠迎趨候缺然而問勞先及慰藉深至坐令寒氈暖於爐火感愧如何空谷沍巖足音為寶乃復見諸綢繆如攜百朋破雲而下即此情懷便是吾徒所驚弟辛酸已久無一語足樂當借兄臂次開之舍飴之賜徑拜其三分繞膝下知台翁遠意溫存謝謝惟愧不悉

答徐孝廉書

早出至日哺始歸見台兄手教情溢於辭又接鹽梅之貺義重於物長安三年得睹家况氣味肝腸一時並注自老母而下皆受兄賜再接再珍盒愧不可勝弟索米長安尙酸楚如故兄建鼓中原便隆至如此人廣狹不同一至於此是雖制史公之力亦自徐九老手段非黃生所能步趨也餘俟春日鳴謝未悉

勤王書

別後艸艸不盡言懷救寧桑梓極爲要事誠得井里無恙父兄子弟稍得安枕此其功不下於匡合也但四鎮據有江表三輔未盡帖席史道鄰北伐後勁無人深爲桓冲根本之憂曩時朝論不喜勤王今已翻然有手足頭目之慮援兵亦許動正餉矣陸按臺前疏以黃東崖及不肖輩有意勤王爲請今已旨下著按臺自練三千來駐江上而浙中未靖不便募兵似以吾鄉義從調度爲安僕既四壁無徒又先已脂車不能還顧誰當慷慨爲賦無衣者車田吳生賢士也有田子春太史子義之風諸兄能與共集一旅應按臺之求乎按臺本分有鹽課三萬兩足支一半餘者可動公餉撫臺今當共成其事唯道路行帳行錫節制之條要與鄭家軍復別用餉不多而取效更捷至江上時奉命進止從中調度必不至危疑也諸兄幸詳審之僕在建安待此以爲餐寢耳

京師與兄書

三月初得兄翁書如云朝廷不苦無好臣子家中苦無賢父兄是亦爲政奚必拘拘於此哉眞明通有道之言也弟自二月十三日救鄭平嶽并爲文滫持姚孟良申雪以後無日不思回家但爲去冬纂述經書未就不得不暫留於此之興廢命也行之汗深人也知進退存亡不失其正謂之聖人此亦可學而至耳七八月

看經書可就今先纂洪範月令儒行緇衣禹貢周官六部亦可二十卷可二十餘萬字非八九閱月不能脫艸也五月來有推枚卜之命前年以上疏斥首輔又言今春災惑在心尾間須防火災宜慎火器悉飭戎務爲重慮今四月初五日新火庫災損房百餘間燬命七八百幾與前年王恭廠相似不幸言之而中然此小輩何足復談今似不得不推十三日會單推舉但未知上意如何耳此看吾道蒼生非獨學問山川而已家中極宜恬澹最不可投門契此吾憂也唯兄翁能禁之

京師與兄書

獻歲聞四姪舉男歡喜欲舞京師蕭然無可爲贈者具一杯想已到今再寄佛郎銀錫二條雖微足玩也大兄今年七十又舉孫是家門吉慶祖宗福力留在當身唯當敬靜保養以受期頤之賜周至京一載歲暮始得轉官是閣臣迫於公論不得不推亦聖主千秋特達不爲諸謗所動如諸當道直以周及鄭平嶽爲朋黨其所下石者亦無不至耳世間樂事唯有看子孫讀書栽花種竹耳天下自是天下蒼生自是蒼生而必以天下蒼生易兄弟子孫之樂眞爲不知類者矣銅山諸親友皆無可致意者歲月易邁親知難逢媿吾淡薄長懷此心可相諒也

京師與兄書

臘月廿一日子時漏三鼓弟婦免身得雄起視牛魁初上東方柳宿正中髮覓火燃燭而啼聲已嗶亦一快事也吾家六世始得一官吾行年四十七始舉男子所取於造物者甚儉造物所報我亦自不薄今惟大家勉善受福而已士君子生世須有自立每對人言事君易報親甚難事君者一致身便了報親者一致身便不了耳前諸賢疏薦者固多諸羣小耽耽者不亦少矣有咎譽便有不虞求全者皆是眼前風旛於吾身上

無一毫干涉惟種松理竹哺兒弄孫此是乾坤極大事業也明春正月後便可發舟大約夏中抵家不悉
周不肖負祖宗父母之恩去歲過北司毒楚百般幸得不死今歲六月西部擬戍上猶未允自古文臣遭此
者唯某為最甚自百餘年來僅見聖上每以此事問諸大臣無一人啓口者而江南盤金之說甚為羣小所
持今稍稍解散猶未知聖意何似九月初舊輔周賀再入閣上亦問之未肯別白真某不肖不足以信於公
論耳亦大家不肯擔事聽浮雲自息白日自開也武陵已敗韓城已刑諸羣小亦心孤倘有人出一言則天
心自轉而人皆以葉潤山徐德公為鑒又九月中內傳問劉念臺及顏壯其一清一博可用外廷推劉為少
宰承推上一宿即下則天心可知矣儻幸不死還山守墓脩未盡之業以骸骨還父母以爵祿還朝廷以事
業還天下以公論還萬世是周之本懷也

京師與兄書
部審尚未上疏而劉司寇又以它事請告又就關數時備疏上不駁則結局甚易如一駁再疏則更遲數月
但以出獄為幸不問其它也吾意亦欲上一小疏引罪請命但須部疏先上乃敢請耳中元山中誰復灑掃
大爺想在銅山覺子亦不能至浦念之心切前兩番寄吳生書想已到其理還諸鄉親助贈之數當一一清
楚雖時培所贈亦還之也古人不以生死易也吾豈以患難改素百諸牢碌皆由人謂江南有欵金相資以
致虛名而賈實禍吾早已慮之矣覽書讀四書溫詩書兩經再讀禮記諸大篇及易皆略為解說看日記故
事及小學勿令曠功也

五月二十日仗祖宗父母之庇得完手足膚體復自北司送還刑部六月初一日刑部司官難於審擬又上
法司會審之疏初四日奉旨該部即遵審擬不必又行推諉則小駭矣蓋以此事原非重大以前日徐德公
疏救之後去一大司寇廷杖一司官諸司縮手不敢問耳此事出於薛國親為嗣昌脩隙及國親敗而下手
愈毒范伏粹護之至今春大赦而伏粹不以此案上聞為通國所噴五月初伏粹趨朝見為厲鬼所攝而嗣
昌亦已死故伏粹罷去國親遠避凡再上疏皆以門戶相批總總不忘雖不就繁亦失負隅之勢矣當嗣昌
死時聞上亦有意擬罪而省臺攻者日至上遂激怒欲加贈卹與諸臣相反諸臣憐憫無復敢談及我者在
北寺五月餘拷打訊問四五次備極慘毒然於吾德業上無所虧損漢宋來僅見一人又以司招著許臣虎
扳扯六七人使黃陳文董皆繫刑部而楊機部劉魚公猶未見回話此事情不甚重大亦北司亂扯欲以講
學了此案耳今四人在刑部者日有怨言不得已遜謝之耳魚公蚤晚回話可止想家人惶懼可慰安之也
陳慧生先後屢有異同當道覺之以此未還職遂起盧雲際此為鄉里小人所誤耳吾又以北司扯諸人蒙
詭探所痛心然諸人今亦見諒也蚤晚當審大司寇劉司官張皆未有擔當亦不知天意回轉如何言路
臣又執不與嗣昌贈卹某亦未得解脫言之惟有浩歎世事如此得一殘喘還該丘墓雖荷戈執爨亦不為
苦是天下之恥非一身之辱也德公體比益健成一奇男子但愁苦家人耳慧生無端被扯當遜謝避之覺
書子讀四書禮記須溫習雖未動筆且須講貫也大爺此北山縣縣為念諸不悉談

墓前知大爺時時省親諸屋無恙聞銅山亦折殊為懸心大抵墳墓前物皆不可輕動自浦中毀拆來許
多心痛不可言然是墓前廬舍終有傾壞破碎時候拆之無悔也塔可不必耳然太迫去之亦佳不足為惜

諸子弟想皆讀書四方盜起寇并急京師米貴今又運糧不通雖發倉能濟幾何來者皆未能遣歸亦未
有定可復兄命也生平孝弟功疎受此奇禍勸諸兒孫讀孝經不必更作舉業也老大不必出門只過墓灑
掃待周明年自歸來耳他可不問也

與兄書

吾過刑部來都平安賀對揚諸老再入中書當調停不至如前人之狼狽也陳贊皇之徒極力下石吾既不
死仰戴天恩過此亦無憂慮唯世道播頹大厦將傾是為慮耳自楊薛亂政來天下破壞百餘州縣陵夷三
藩而當事猶不悔悟是可歎也吾一身與蒼生分痛當事雖不諒天地鬼神自當諒之唯以孝弟未能反躬
多媿耳運糧不通而信甚急唯有江南吾鄉安穩不知何日得歸今唯尚未再上看九月末十月初如何
雖未了澈然可無恙以七尺還父母是吾願耳不必挂心百事含忍都可付之無言看祖宗父母福力也

與內書

吾瘡百十日尙未愈二十一日子淵到知家中平安兒子俱入津方先生宣官全年束脩不可少也刻成儒
行一本作故事命兩兒讀之其已讀詩書及四書都逐日溫習講說大意讀書不作官作名賢可傳可法足
矣子淵來時乃未知吾痛楚諸輔已去構毒日深近薛輔回奏又扯我為門戶疏雖未下大意謂我已處出
於聖裁而錢牧齋吳昌時疑其挑激遂傾陷之此事都在吾就逮之前想上不疑然諸奸之構謀可知今已
七八日疏不發票而其辨賊疏已有遠意羣奸再敗則其謀自絕吾堅忍以待之耳歲前不上疏看明春如
何涂德公懇懇上疏救我通政不敢奏亦是異韻也諸時到浦中墓下看顧為禱廿四日

與內書

前六月十六日書想已到家刑部再審尙未過堂大率保全性命不求其他今赦令已不行軍徒皆許納贖
然吾讀書清素亦無千金納贖之理雲日蔽虧乍開乍合但委心聽之耳薛國觀蔡奕琛在此日日遷延想
聖心難遽開悟遲遲還期皆未可定也覺贖子皆與讀易經大文并四書詩書溫之或禮記中數太篇涂德
公想少不得一遺講學為朋黨禍不甚大諸奸情狀上亦頗知但以吾強項苦相摧折耳世事難為還家教
子亦可報國唯念二人丘隴日夕夢想皆用煩心薄田入少山中人稍稍施惠或大爺不在山當令人看之
艸木杯土不可輕動也

與內書

九月三日石齋寄家中知吾案尙未結諸子皆無恙天心轉圓亦未可知諸奸亦悉已伏法前四月武陵自
斃八月五日韓城賜死錦州又破陷聖意似已悟諸奸構黨禍國之深但無一人敢為我暴白者近來旨意
稍寬而部讞已重尙在推駁不知見曉雪消更在何日也刑部堂司俱怕大司馬與費縣作合初擬便以煙
瘴上意甚不好今猶以永成相持吾為國家受此困苦雖毀傷膚體猶是顯親揚名上事未至辱先也督二
兒讀五經令背誦上口粗明講說未可動筆也吾事久自然得寬不須煩心前丁寧家中不可遣一人寄一
禮來又不可聽一人浮言今祇為外邊瑣碎使我受苦舊日助禮悉還人明白可也趙司李遣戍鎮海附寄
家書亦略送柴米也諸唯歲時至墓前灑掃勿致疎廢一二石稻亦可分給親鄰勿吝也

與內書

前自五月未過西部疏上尙未允今又兩月矣新輔周賀至不知如何大要不至如費縣并研之甚也事屬
天心外人所不得知亦聽之命也前輩更此患者甚多薛文清劉華容諸賢皆受之家中不必以此挂懷吾

在此中稍理舊業完易象正一部并書孝經百部以度日子看天意如何耳覺子慶子幸讀書今年能讀禮記諸大篇并溫習詩經粗曉大意便好也吾九歲十歲已作文章但未成耳覺慶稍遲爲之須多讀書識道理久之下筆自然成文矣韓文公諸篇明白易曉者亦令先生選教之魯心通能動筆也吾在此自是千秋事業親戚不必慮人患不實落忠孝不患禍害迫身也大爺常在北山看廬舍爲幸看今歲冬至前得放歸便是大家萬福

杖後示兒書

覺子知汝今年已十歲有知識讀古人書當曉其道理如人之邪正事之可否皆須問先生略識大意至於事親當孝事君當忠事長當順處友當信接人待物當誠敬有禮此不待問而知也慶子慶子尙少當步步友愛教之先生必尊敬事之不可一毫疎慢言動起居皆須以禮不可一刻造次聞小兒輩談俚語鄙事則正色待之見尊長則肅然起立遇官人下顧著青袍面之皆須一跪時時念汝父艱危受苦也北山灑掃以時節往見大伯必呈所讀經書不可一毫超越馭家僕子不可出聲罵詈伊亦人子欲有體面其理一也吾身已聽之君不必煩苦汝唯讀書以聖賢爲師吾願足矣明春看吾得歸汝不可失業也覺子知

京師與女書

丁丑三月十九日

小姐知爾不幸又喪吾節翁矣門戶清冷支持爲難祇看伯勤讀書耳伯勤弟妹須留心省視祖母及母姑在堂宜十分和順不可有一毫言色崖異吾不孝未能十分和順然恃處父母平常也爾所處不同宜十分和順朝夕起居及餐寢服事伯勤及祖母母姑致其婉嫻勿使吾煩念也

京師與婿書

丁丑三月

荼毒若此又何言一月間與尊公促膝不三兩日見其色枯神脫甚不樂臨時不及阻其應試使其奔命筆硯間眞吾及緣翁之過也三世清修四十年苦節頓爾蹉跎爲良朋所歎奈何僕聞之痛楚欲絕如僕者眞媿負尊公耳令弟未昏薄田未足以祭以此念吾甥也小詩八章以當引淚

京師與婿書

丁丑八月

爾在苦塊中當復綴業三世清緒在爾身中鄭重如何日來南至者稀竟不知親靈何日抵舍每望萬里淚與風俱朋友悠悠永歎之懷不過如此而已自道生喪情致已薄不圖板蕩及我節庵百贖之願誰則無之落落如余覺世道艱危生存無益耳

京師與婿書

戊寅正月

見吾甥書知親靈已至留滯道隅棲遲江口念之酸鼻以節庵如此行誼作如此進退悠悠彼蒼幾不可問宏大擔子並與直杖託之吾甥過此以往當復如何努力人生不得違事二親讀書無益但至此愈覺圖報深創耳司空清德前効未收孝廉實修中道又廢今日切勿問人吾生平祇是喫苦再不問人十七年詞林寥落如此惟朱節菴作得頭對今已矣唯看吾甥耳長安交游盡絕諸生亦不復往來而猶信者日夕投戈幸賴主上聖明屢開其網獻歲七請未得歸今當再過夏知吾甥家事口重大但當以省小了之吾疎失不能盡情也

京師答婿書

五月十日

見來書使人辛苦所痛者節菴一生盛德掩於風塵之下未有以示來茲耳吾懶散如司空公一誌亦廿載不成歲月易銷情誼不過行當了之矣人情固險有道者持之以安其次莫如忍若與人往復是與流俗同

道也吾行業無似每覽孟氏存心之篇常爲興歎汝讀書自當有進於此者天下何處無三十金肥人自肥瘠人自瘠而不然捐與之矣吾極貧然每思萬不疑劉寬沈麟士之行皆吾師也認屐非小認牛非大不爲微行亦可學也六七年前吾見汝作書亦有氣質今遭荼苦愈增其愴學問故無窮不可令兒曹帶外家氣習耳貧是吾儒本色受侮亦是吾儒本分生長高門者自未見慣耳吾與節菴即無親亦是老友見汝高才讀書兒女成行勉事祖母何常不樂吾爲嘔強困頓一生永以爲戒世間侮人者甚多正須以德度化之也

京師與姪書

汝輩讀書不見長進皆由志願不大自游夏高堂生董仲舒作如許文章或親見聖人或聞之於弟子發心直上便千古相等吾起於海濱無尊長提誨親朋切磋然見人一篇好文章未常不思見其人以是稍稍有所得雖不敢與諸賢並驅然於孔顏路上湛心拔理較諸賢覺自不同亦是諸賢之力也汝輩祇汎汎章句如何得有出脫之日聖人每說日新不是湛心拔理何由得見日新之妙爾輩祇是日舊耳今年所得明年舍之今日所得明日舍之如破艸鞋走上十里徒墜谿谷耳當看得賢者心上不著一理不著一法祇是志高學茂古人如極粗人卻言言合道今人雖極通顯卻有手口轉輪如無路來者所由立志不高取學不茂也吾今年得陳臥子四五君都奇可爾輩自看精神與諸賢何若如吾者祇是不若他耳今爾輩學之兩年如復不能則又手拈足屏口看鼻學老木頭去才成得朴僕不自墜壞也

丁丑八月

京師與姪書

子靜汝讀書幸自愛少年努力爲聖賢得中人如在中人下手到底下流也汝精神溫秀又有峰巒可時看關閩濂洛諸理學家言自有入手乃漸看漢唐以下如張良汲黯董仲舒劉向第五倫黃憲管寧諸葛亮

陶潛王通馬周韓愈李泌元德秀韓琦范仲淹李沆司馬光李綱文天祥此數人者寫其全傳出入袖中久之自然成人如汎汎度日常有醉飽之心此朽木糞土終不可道矣世人讀書能作文章祇是無本領雖作文章好亦無用處汝文章猶未平達而多有枝葉須明明白白不悖聖賢乃可言文章吾今歲決歸時看汝袖中可有何書可曾寫不寫曾讀不讀雖不觀文章可知矣作子弟茂才須十分謙謹石慶所謂馬無五尾終當謹死也窮秀才自家擔荷汝一主一僕量爲過矣即多一僕吾亦不怪奈何以此開衆人之口乎

京師與姪書

父兄不可常恃鄉國不可常保人當自求之身汝豈不知作官是禍難根本凡人讀書不過爲君父耳

赴建與兄書

洪思曰蓋將赴建時之所作也時黃子在江西道中

余廬居墓下瞻聖先皆十有五年矣一土一石一艸一木隴手自營植依依廣次如在膝下中間離墓次而冒京塵者十有五載中僅四年餘耳憶自少貧苦居無環堵之安食無甘旨之奉嚴父見背於盛年慈母未豐於祿養啜菽飲水涕泗滂瀾自以經經之守澹泊寧靜與物無爭自圖書數卷而外有粟數石松竹數株爲先人體魂之所安棲禪子嬉游之所日涉陶然自適不知其他每歲時粗具杯棬未及俎豆在銅山祠堂則吾兄克備誠敬吾終缺然未有牲醴之奉榮錫之施是吾所報本錫類不若吾兄之戀戀子舍如在一日也然吾立朝值艱難之會未有報稱不忍緘默以負明時又自母歿而後以身許君既受殊恩勢不容默前後三十疏原本仁義冀欲匡時不負蒼生而多言數窮遂招物忌計吾生年以來未有一言一事內不可告於妻子外不可告於朋友幽不可告於鬼神明不可告於黎獻者但見曹尚幼未能讀吾書知吾志誼所在

耳吾行後歲時省掃先塋一二書籍以時晒貯個人舊有九十石新有三四十石餽粥之餘可分數石以周諸親之貧者倘蒙明主再赦生還則但與兒曹誦詩讀書切勿輕談仕進之務也五月十二日不孝罪人道周書

京師與族姪書

每想白兒筆下清快機穎欲來吾家中千里終當託之幸善視勿虛歲月也吾浪浪從人自是本意決一救饑無能大奮以爲宗榮百事繁費得無爲累乎天下多艱仕途良苦百姓凋瘵離心易生吾爲一虛名遠離膝下託身漏舟之中非計也凡宗族一切安靜與七世惜福維持之也

杖後詔獄書

樂正子春下堂傷足二月而有憂色沈麟士子判簾傷手涕泣三日不輟或問其故皆曰膚體受之父母不敢毀傷是以然耳今吾雙親已葬三兒幸自歧巖雖委心闕下誼不敢辭然於小宛之詩負媿多矣崇信奸回賊虐諫輔朝廷幸不至此而慎言慎行寡尤寡悔吾猶未之能也天心乍開而復閉羣小之護局愈堅相傳主上欲大推頓我以紆召對之憤此若盡然亦蟻蟻之達天直怒耳魯國男子古今不絕幸有葉廷秀粗成鬚眉今吾血肉漸收兩脚能動日嚼白粥數碗大抵徐俟論定必無虛空造律之理遲速聽之也家人來此只可單身子姪輩未諳練不可遣來俾吾煩悶也險巖峻嶺已過之後亦是平常但願我家宗族多行善以敬天怒承天休百年之身尙未艾也

與外氏書

入都道上
與蔡太公京師甚倉皇可念今已行直欲飛度朝夕入都而驛次蕭條低回丘墓惟有傷懷耳途中幸以平安爲福仰

藉尊庇庶可無恙也有司極不可與相知家中子弟亦禁不與有司往來輒悔是長者之風千謂非吾輩之事此行看岳翁宏庇辛未夏間便攜家南旋每憶空山封土未固隴首松竹未生夢魂食咽爲之慘然也

與外氏書

出都道上
與蔡太公二月六日奉旨處分九日出都門從此灑然無所繫累有子可報二人去官可報君上昔人云有子萬事足無官一身輕誦之欣然也舟行水淺七十日才至淮安值覺子出痘極煩心今幸愈矣想當住少時才可買舟下浙江也署中欲在南京過夏取次下鎮江常杭之間尙須夷猶數日到處訪諸山川爲兒曹開眼或中秋前後可至空山也覺子生七十日見書便有喜色亦是異事但恐後來拋官上疏耳五舅得雄未此事重於作官要與作官同是一命不可強致也四月二十八日舟次白門道周頓首

與親串書

近雖偷陰而謨畫不定援兵小至遵永東西指臂俱斷羣臣苟且容頭過身甚可歎息吾以出山大義不敢反顧今坐漏舟爲之不可言之無益煤高米貴更不須言生平落落竟與衆人同道躊躇顧盼還山誓墓悔之晚矣每念古人朱晦菴陳同甫之間不覺興歎今日唯當精研古今興亡盛衰變故之運持以寧澹發以眞誠雖無旂常自當日月近來閉戶補未完書如火燄中誦經當啼足笑間有豪心輒復自止唯云大業易斷至道難聞而已病人耐夏病國耐冬過此歲終別圖下手夢寐飲咽唯挂空山信求志之樂眞達道之累大也子弟幸勉旃聖賢自期切莫與世俗共處五月京師寄

與倪鴻寶論書法凡三則

書字自以道媚爲宗加之渾深不墜佻靡便足上流矣衛夫人稱右軍書亦云洞精筆勢道媚逼人而已虞

褚而下逞奇露艷筆意偏往屢見蹊逕柳繼之援戈舞錐千筆一意自此以還遂復頗傲略不堪觀才姿不逮乃詆前人以爲軟美可嘆也宋時不尙右軍今人大輕松雪俱爲淫遁未得言詮

太極殿成謝公意欲得子敬書之舉仲將事告子敬云自仲將懸榜之後勅斷兒曹不復作書自此楷法絕少欲此動子敬也子敬直云仲將亦是魏朝大臣乃爲此事足占魏德不長謝公遂止乃命張翼爲之翼書八分絕佳見晉人帖中有翼數行乃似章草亦鍾索之亞也

陳雪灘之爲松雪倪鴻寶之爲子瞻不獨規模應則其神理亦且超前矣董先輩法力包舉臨模之制極於前賢率其姿力亦時難佳邢子愿米仲詔各有其能大要貞元而後永徽而前求其米筆亦不復可得矣此俱鄙事留之浼人終冀吾曹勿著此手

簡寄大滌與義兆木上辛巳至甲申凡四函

庚辰秋間知兄賃舟將渡江久之不肖積戾貽憂親友闕慎功疏自取罪咎亦足爲吾黨鑒戒也生平孤立垂老無朋惟二三兄弟間關言念無時或聞今或藉天好生道遙林壑進絕書史漸造敦默以開濟宏願讓二三兄弟爲宇宙幹此賴波使後世談者謂不肖在武林尙有丘明伯玉之契以載華振海傳之無窮實厚幸也文章雖小技然既藉此津梁不容不肆其力百分中間有一分退避不得惟吾兄與諸兄丈奢圖之也木落風寒容與桐江又四五日適客累人難超然於猿鶴也知兄省家情迫而十餘年同遊有此一日誼不能捨常誦佳韻以示來人耳講論世所畏聞堂構規模切不可令人側目留此一段證對前賢非爲世途宜其壇表也臨安諸詩少此番出處未成章句過建溪來作環音并同患三十六首可與義兆兄商之如義兆已行可補入前艸度無缺陷前艸多艸率誤字幸改定之涉世甚難應酬不易反躬以來常如集木請命未

下夢想爲勞義命之外不知其它

鹿鹿數往還無益人事而徒爲諸兄煩苦真慙愧也此番筮命得藉相慰亦自佳譬如遠行客叩門過相知不似剝啄者耳象正似可起手此道不須借語於人切不必請序請跋惟相契兄弟於卷終送難道亦不惡然正不須多也詩艸率有未安者不妨改正見諸長者有爲講堂捐助者甚可已此寶開恐來旁議吾輩圭竇自映枯瑩可掃何必合侯鯖以爲明光乎有一函寄陳臥子者內左滄嶼誌銘一道倪鴻寶序數行至即達之無它也

朋友纏欵聚首之情至彌月經旬可以已矣曩日留連江潭慰藉至今愴然目下儼裝趨命似不容更爲裴徊當以初八九抵都且宜日夕涉江以待風信台兄與木上權即分手明歲花朝而後冀藉台福乞假還山夕陽逕外梅嶼湖邊瞻眺非遠比日煩費非言所盡粗告別意不悉區區

與倪三蘭年兄書凡二函

兄歸而遂萊舞之樂使林猿淵鳥共愜和薰少需清風以濟園化自吾兄弟咸嘉賴之但使明主不聞讜論國澤滯於枯池推轅覆車徒聞將伯亦逸人之所懷音遜士之所遐歎也鴻寶來晤聚四五日剔石接梅窮極湖西蓋自王謝以來之所未見想伯兄於剡上得之不淺也鴻寶歸悉至情謝謝時在湖上

東三蘭

病久乍作乍止幾爲怔忡其遺忘前後有甚於怔忡者欲於此決歸又爲筆楮沾滯抽身不得鬱鬱不可忍前面楊伯祥知有便鴻未敢遽附寶兄書年兄見顧不及擁簪遂惘然如坐甕中台翰至又不及復答凡負兩大罪微年翁誰諒弟之顛癩者丙夜焚膏欲了司經一案遂拔足南馳今倏忽過正月未能拱手令寶兄在此當助弟頓足也劉丈朝夕歸弟不能一拜真是怔忡所奪前後遺言年兄凡積五六箋俟意思稍開即

濡髮就之弟行徑如村翁負官炭日夕燒柴手面黧黑不能復與餅師唱歌耳唯年兄致書爲寶兄千萬珍重中厨火起無人搏滅終須君家兄弟某以尊醴熟後再登秦望之山謝劉先生晤執未遲臨風懷想

時都在鴻

門答復倪寶兄索書

寄家書補遺

初入都時值去輔正逐人心翕然以爲天意已迴而武陵屢爲言者所侵主上自護其局八月初四日正當發刑部而先一日葉廷秀疏救請釋放及會議主上遂赫然後先予杖比來杖至六十者多斃此番三人皆藉廟社之靈得以不死今解石老葉潤老皆能稍行立吾雖在牀褥而元氣已復看九月終可曠履自在也此事聖賢所不經然亦不墜聖賢之路一時辛楚久覺泰然也嚴旨雖云依律而主上近有悔心吾今穆然應之咩羨路絕不知何者爲法律何者爲囹圄蚤晚覓數部書再完前事今猶之墓下窮經耳墓前東後座拜亭令整齊作一橫牆遮拜亭前開門於夾屋中間北出諸舊門路及西邊牆基皆整齊平之無害也家人還住山中灑掃看兒子讀書勿以吾爲憂也

黃潭浦集卷二十

序

大象十二圖序

大象十二圖何謂也言夫懸象之大者也天地懸象莫大於日月有日月而後有水火有水火而後有山澤有山澤而後有風雷水火生於日月風雷發於山澤日月不明山澤不靈故易者日月之謂也天地之道一治一亂日月之行一南一北北至而羸羸極則必消南至而縮縮極則必復天地之仁實其陽光日月之智尊其往復有往復而後有交會有交會而後有薄食有薄食而後治亂見焉乾治於南以日行高而謂之北坤治於北以日行下而謂之南日行之有高下乾坤之始交也屯蒙從坤而在於南則需訟從乾而在於北南者陽乏故經綸以造其端果育以正其則北者陽饒故燕享以通其志作謀以集其事兩者聖人之慎始也師比在於南則小畜履在於北南有正主故容畜親建奠其功北有疑客故懿柔辨定貞其志兩者聖人之辨位也泰否在於南則同人大有在於北謙豫在於南則隨蠱泰否日月之正交也泰否正交反類而必復隨蠱正交有事而无故以爲是日月之常行然而聖人始憂之矣聖人之治日月於其北而南不於其南而北否自北而南泰自南而北蠱自北而南隨自南而北兩者中國夷狄之大界也臨觀在於南則噬嗑賁在於北剝復在於南則无妄大畜在於北臨觀剝復則非正交也以自泰否而來入於半交聖人猶且憂之故裁成欽德宴息振育容保設教安宅閉關聖人非敢託之无事也以謂是陰陽疑戰邪惡攸伏不可不戒也南有重頤北有重大過南有重坎北有重離如是不交聖人不敢以爲无事頤大過交於南

坎離交於北於是則日月正交日月正交雖有既歷无所避之聖人亦曰吾謹細行以受大降立師道以正君德如是而已矣故講學修德聖人所教日月也日月治則水火治水火治則天地治然且聖人治水火不敢曰治日月明兩之道不屬水火以尊日月是聖人之慎也盛德之至也風雷山澤日月之氣質也天地水火治於上山澤風雷治於下日月北行山澤發榮日月南征風雷變聲故恒在於南則遯大壯在於北咸自北而南恒自南而北遯自北而南大壯自南而北故虛受特立遠惡克復所以靖二分之路謹春秋之治也聖人不靖二分之路謹春秋之治則上无以爲君下无以爲師故晉之用明明夷之用晦家人之正內睽之正外聖人之學於水火則必有取之也晉明夷在於南則睽家人在於北蹇解在於南則損益在於北聖人之憂患蓋自是而至也上世之聖人雍容以治禮樂下世之聖人黽勉以治過惡表短而景長魄望而晷中則聖知衰矣故夫姤萃升天地之變位也夫姤在於南則萃升在於北剝復无妄大畜之次於是始交亦是始亂也頌祿施命以收人心耀武升中以固衆志是非聖人之得已也有德而无其位有位而无其時雖天地无以得於六子而况於聖人乎聖人之有困井帝王之有鼎革猶日月之有交食敬其時位而无敢改於其德困井在於南則鼎革在於北師之於君敵也震艮在於南則漸歸妹在於北婦之於男非敵也隨蠱漸歸妹之交不有女既則必有戎既乎是陰陽男女之雜也天地既譎著於日月夷狄女謁闕寺強臣奸宄盜賊六者相爲起也聖人不治之以干戈而治之以禮樂曰永終知敝居賢德善俗若是而已矣豐旅在於南則巽兌在於北巽兌之在於北猶震艮之在於南也震艮不在於南巽兌不在於北則是風雷山澤不讓日月之路也風雷山澤爭日月之路則聖人之治亦窮於无所措故震艮強也強而治之曰反躬止思巽兌柔也柔而治之曰申命講習離之繼明坎之常習則猶致此意也兩女必嫉兩男必爭何以止之曰教與

數故易有十一教者蒙小畜蠱臨觀大畜坎損益漸兌是皆明王所教天地日月之具也噬嗑賁豐旅之治刑獄則非聖人之得已也渙之享帝立廟節之議禮講德則猶是君師之事也渙節在於南則中孚小過在於北中孚小過交於北則既濟未濟交於南兩交者天地日月所爲終事也日月不交則禍譎不見禍譎不見則天地无所施教於聖人聖人无所施教於天地泰否兩濟之交於南治亂以之終始隨蠱漸歸之交於北華夷以之中沸頤過之交於南王者以久而絕坎離之交於北霸者以驟而滅孚過之交於北於中華乾坤之交於南中華以

此八者聖人所爲慎豫以救陰陽之敗也赦罪緩刑輟樂遷次修恭儉之節以致愨哀敬非所謂救敗於大也故易者爲救天地而作也救天地則必明於天地之道明天地之道則必清日月之路乾坤泰否隨蠱頤大過坎離漸歸妹既未濟中孚小過剝復夫姤萃升晉明夷二十四者日月之路也以是二十四者加於定衡環倚體用六圖者研幾辨物其道无方舉其梗槩爲十二圖而日月之治南北羸縮朔望盈虛交會閏餘亦略著於象是古作易者之意也

圖年十二圖序

圖年十二圖何謂也言夫大象之圖年者也天道積於上人事漸於下衆積而神漸久而天故百年之圖可以觀智千年之歷可以觀聖也乾坤二圖百三十五年中於天地以爲主柄屯蒙而下兩濟而上二千一百二十五年左右南北相間起也定者以定衡者以衡環者以環交者以交體用通實因而乘之四十八圖相追求也酌而舉之曰十有二夫以二千一百二十五年之事足其文獻研其爻象天地之教戒鬼神之情狀可謂備矣故春秋者天地之自修也詩者鬼神之吟咏歌嘯其事也詩與春秋遞爲爻象以圖天地而人猶以爲不備則是人之智大於天地也夫欲觀以易簡舉其始亂其惟環圖乎平桓之間經綸始興文素之業

代爲明王周襄而後齊晉乃霸宴樂作謀以匡天下簡景之際容畜親建雖无王者未迨於亂敬元貞定遂及四國囹圄十一王謫柔辨定近於虎尾故國之與易以四相起夏冬之義於是兩至矣秦否而下聖人所不親治也然而聖人皆治之裁成輔相則非貞定威烈之事斂德辟難亦非韓趙魏田之事也而聖人以此兩事者定進退之大計類族辨物遏惡揚善不謂衰世而廢主柄也安顯而下何觀焉謙輕豫怠其謂觀報之世乎八百之麻移於西土嬴氏受之以帝天下真多益寡殷薦上帝其謂是周秦之際乎此三際八王者聖人之所不與也而猶與之治道以示百世故聖人者憂天下之至也秦否而下至於隨蠱四際再交嚮晦復明及於振育秦室三王以迨漢祖上沂貞定爲十二主故四際十二主天地所紀治亂也隨蠱泰三姓之間或滅或興往替而來隆往枯而來榮君子視之以爲天地代謝聖人謂是宴息寢興要歸於振民育德而已漢惠而下暨於文武容保設教庶幾有焉武帝中年迨於昭宣王霸道雜以尙刑法孝元而下至於新室遂爲剝復此三際者二百有四年判三十九年繫於前際安宅閉關聖人所以保治之固也建武而後迨於明章茂對畜德庶幾有焉和殤安順是則頤養獨立之世也君子修道以治天下大之不能容保設教成臨觀之治次之不能茂對畜德循无妄大畜之業而課績於寢興攷德於言語飲食以爲是裁成輔相不懼无悶者是聖人之所哀也冲質而下是則坎離之會也坎陷也離麗也陷而有所麗則必有異姓乘之而起矣曹魏之事是也此三際者二百有四年判三十九年繫於後際習坎繼明聖人所通變而起也自是而下則山澤風雷之治矣山澤之有龍蛇風雷之有災眚聖人之所畏也曹氏四主與季漢共治季漢不滅司馬不帝虛受恒立猶未及於經綸也晉太康而後則遯太壯之治也惡惡而克復則足以戒女既足以戒女既則足以戒強諸侯足以戒強諸侯則足以戒寇攘矣三代之既至於晉而備有焉晉之有遯太壯晉明夷

百三十七年備有三代之既非避明夷之足以既晉也明德不昭而非禮則履之過也劉宋永初而後至於蕭齊之初政治修明在於北魏而臣弑其君子弑其父南北遞有也修德宥罪懲窒遷改自齊永明而下隋大業而上聖人无望焉耳无望而猶且治之謂是百世之道不在於數代也故自曹魏而後至於義寧而降四百八年與漢相直七代三十六主之不在其科篡弑叛逆不可勝數也聖人猶不忍以是輟明王之治蓋自夫姤萃升困井革鼎終始唐室而後天地之教戒深切明著也夫者亂之始消也姤者女之始壯也夷狄盡而女主興禁門之蹀血牝主之決事非易之教也而若易有此教者唐人皆用之萃之不虞升之高大景雲開元之間是也困用致遂以出於扶風井用勸勞以綏於河北革始於長慶而主无正終鼎盡於大順而祚乃更始唐室四際二百七十三年發於夫姤斂於革鼎天地之正限也天地爲限聖人不違聖人立教天地亦不能違之治國明時正位凝命自堯咨以來亦有豫策於唐昭朱溫之事者乎朱溫之得爲長子李存勗之不得爲長子則亦天也恐懼止思君子於是致深戒焉耳蓋自建隆而後則漸交有歸妹矣隨交於蠱秦漢始交漸交於歸妹而宋室始立兩者日月之大應也居德知儆前宋數主亦庶乎有之也窮大而失居親寡而无容真仁神英之間則亦未之及也而元豐唱既紹聖繼之訟獄繁興豫大自絕建中靖國之間卒與永嘉建興同阨故震艮陽也兩男之闢出於中華一際之間五姓十主巽兌陰也兩女之闢出於中交之際兩喪其雄故衡圖之爲坎離兩濟環圖之爲震艮巽兌父母不御而男女絕譽天地之所畏也中孚小過之似坎離臨觀遯大壯之似震艮巽兌天地猶且畏之猶且畏之則必就聖人而問道享帝立廟議禮制度雖在顛沛不可廢也以爲是先王之禮樂存焉可以立教可以立國過此以往則天地之事也以天地之事託於聖人聖人无所辭責則不敢復託於天地是十二圖之事也

乾乾坤坤序

凡卦皆一體兩象反覆異名惟乾坤坎離頤大過中孚小過有對化而无反復其實日有晝夜而時通二六八體反復皆十二爻屯蒙以反復而得二名乾坤以反復而得一體其一體者不必二名其反復者不必對化故以八體卦之對化通於五十六卦之反復皆舉兩端以成大例非因綱紀而有異同也故爲乾乾坤坤首立四卦雖以用九用六得對化之名實以一晝一夜通六辰之義晝夜雖有陰陽反復祇成一日約之則曰三十六象通之則曰七十二卦或謂父母六子相與錯綜祇得六十四何三十六七十二之有曰反復對錯綜易皆兼用之錯綜之有重乘反復之有不動與對化之有不對化單舉之則難明博觀之則易著也作乾乾坤坤四卦序第一

屯蒙需訟師比小畜履序

乾坤萬物之生始極南而乾極北而坤晝夜積象乾坤兩乘自分左右天地升降帝王盛衰皆於是爲限衡交者兩乾盡而交屯蒙兩坤盡而交需訟倚交者屯蒙自左而右需訟自右而左環交者屯蒙需訟皆自左而右春秋當坤之末端斷坤而起屯故元在乾之前端斷未濟而起乾故屯蒙與乾坤代始者也凡卦以爻當日積日成歲其以六十四卦之爻積日者二萬四千五百七十六凡得歲六十八年餘九十六日其以七十二卦之爻積日者三萬一千一百四十四凡得歲八十六年餘一百四十四日兩法相追凡四其六十八年九十六日得二百七十三年二十四日爲天之交會凡三其八十六年一百四十四日得二百五十九年七十二日距差贏縮十三年三百二十二日爲天地交限之差數兩四爲八兩三爲六從於左右與日月相逐四即二也八即四也作屯蒙需訟師比小畜履四卦序第二

泰否同人大有謙豫隨蠱序

自屯蒙環交至小畜履四卦二百七十三年二十四日而五君一民天地始亂泰否受之君臣更端又四卦凡五百四十六年四十八日而交於隨蠱泰否隨蠱日月之正交也日月正交薄蝕所生陰陽雖均而既亂見焉治効之見者謙豫而已同人大有之與小畜履君臣屬雜其効一也作否泰同人大有謙豫隨蠱序第三

臨觀噬嗑賁剝復无妄大畜序

自屯蒙環交至无妄大畜十二卦凡八百十九年七十二日而治運乃究臨觀之與謙豫則猶王者之治也謂有天地之正氣存焉過此而衰矣五行之數五十共治河圖全半共八百二十五約其歲實十二卦得八百七十年半強而頤大過正交與乾坤同象作臨觀噬嗑賁剝復无妄大畜序第四

頤頤大過大過坎坎離離序

凡易上下經各三十六卦去乾坤頤大過坎離六反復卦則爲三十三卦之行二千四十歲又二百九十八日左右分之凡一千二十歲而交於中限與五百一十一歲之交倍追而合者也天地順數易逆數每值交限各以縮圍逆反而歸初七十二卦中分之歲凡二千四百二十二年餘一百六十三日半又中分之一千二百一十一年餘八十一日七分而四際分限正交互直故春秋者以十乘易之數去一而用九易以二十乘春秋之數去兩而用十八詩用易之餘以爲積易用詩之積以爲餘故知易有七十二卦去用而存體及詩得十四春秋十八之說者而日月運行天下治亂可得而求矣作頤頤大過大過坎坎離離序第五

咸恒遯大壯晉明夷序

上經以四分部下經以三分部四三八六積歲相追體卦通數每限六十八年九十六日四卦得二百七十七年二十四日用卦通數每限八十六年一百四十四日三卦得二百五十九年七十二日凡一追限差十三年三百十二日者爲日月之通數其餘積限各不相同而酌於通閏以加減歲實其揆一也追數最親者惟用卦限四體卦限五相距不遠用卦行四限三百四十年二百三十二日體卦行五限三百三十五年三百十五日凡帝王運序絕續之際動差三四年然遠之愈闕不復可追惟十三年上下以五積爲六十八七可追體卦六積爲七十七八可追體用兼乘之卦故以十三年二百三百日間爲日月之交限猶朔望半交於十三日半之會也晉明夷亦爲食限作咸恒遯大壯晉明夷序第六

家人睽蹇解損益序

易有衡環二交依序而求之則獨圓圖而已環圖自坤屯至咸恒以前十五卦一千十六年百六十日在漢魏交際又六卦而入夫姤終魏晉六朝在六卦之內凡乾坤分位自坤起屯至損二十三卦實行一千五百四十七年餘二百七十八日四分用卦之全圖因而損益之故損益盛衰之始也作家人睽蹇解損益序第七

夫姤萃升困井序

凡卦分陰陽以從南北自屯蒙從坤而北需訟從乾而南凡五十二卦一南一北上下分從不失其序故陰爻多者從陰陽爻多者從陽陰陽之中酌從其象惟夫姤萃升上下反居南北殊路是男女華夷之變限也以衡倚二圖四際分之各得十三卦八百七十四年餘二百八十三日而入夫限夫闍寺也姤婦人也萃盜賊也升權臣也四者天地之常孽而卦運間值或數百年以每卦七年分之則九十一年而入十四卦陰陽之變又虞其已邁也姤夫升萃四者錯居其入變限者不分上下初末婦寺賊臣相倚爲命至困井而凋耗極矣春秋已來故牒可稽上自東漢大闍下自李唐女寵或流於六十年之後或著兆於六十年之前雖未入正交體姓如故而陰陽之既發於災戎毒痛極矣作夫姤萃升困井序第八

革鼎震艮漸歸妹序

凡易體卦環圖不分四際自乾坤兩交而外六十四卦從乾右旋二十一限至損益凡一千四百一十三年而入夫姤在陰陽變位之候又二百二年而入鼎革又二百二年而入漸歸妹則交卦盡矣漸歸妹兩濟之先應者也下經三卦雖以八十六年餘百四十四之法相追至於卦象積實一依體卦不可改也用卦環圖從屯立春從蒙立秋起於西北與日右旋而春秋追易逆數之法皆起於東北未濟之端左循下行六卦而歸妹九卦而鼎十二卦而姤周秦漢之間槩可識矣中分二千四百二十二年半否履之間夷夏園黃兩乾之端冰霜始戰學者所致思也故易以體卦爲圖用卦爲候八十五歲相追之法以識交限而已作革鼎震艮漸歸妹序第九

豐旅巽兌渙節序

是在下部弱卦也其交於春秋在戰國之間其交於金遼在皇統之際雖不當正變交會而強主不立興朝不泰二百二年之間帝王風教僅存焉耳自乾屯至渙節二千一百八十四年其體卦中分相值而天道且變作豐旅巽兌渙節序第十

中孚中孚小過小過既濟未濟序

上經體卦反復有乾坤頤大過坎離六卦反復十二下經惟中孚小過反復四卦而已上經交卦有泰否隨

盡下經交卦有漸歸兩濟反復對化共得十六而乾坤兩濟離為始亂合為頂體與中孚小過首尾連貫不得為上經體六下經體二也易以用卦函體卦不自分行其以用卦分行三四相追者每卦之差十七年三百十七日追差之限相距或三年四年上下為陰陽代謝之端故每限入交屈伸之數皆差池三四年不可齊舉也或疑反復交卦各有異象可以遞加反復體卦祇有一象不遞加者不知一象反復各起東西相距三十六卦猶南極北極之明有兩極子前午後之合得六辰何詎怪乎故語體用相函之歲則四千八百四十四年餘三百二十七日為度以歲法為實語用卦相乘之數則六千一百六十年餘二百八十八日以日法為通語體卦相乘之數則四千三百六十九年餘二十四日與通法差準也明乎體用相函通實互推贏乏相追之故則易可得而言矣作中孚中孚小過小過既濟未濟序第十一

七十二卦對化序

對化之與反復互相為用乾坤舉對化以用為體屯蒙舉反復以體為用推而行之兩序互舉屯鼎蒙革各以其類相應為序天地主客八體八交言尋其家或遠或近或取或不取皆求其故而易之微義淵乎至矣故復作七十二卦對化序第十二

先生精于易數著易象正凡先儒所已言者不復述大要以易準于天地故以六十四卦上推天道下驗人事爾代治亂興衰瞭如指掌當時及門甚多而傳其易者未之有聞故先生歿後而易學遂無傳也後學

鄭汝誠

三易洞璣序

慮圖序

慮圖上

肇本先天上元始箕卦周二乘與象相麗斗井箕參為始復次數生以九象生以三三九相乘以別度始一候餘分七百二十有九三候之餘三千一百八十有七歲餘五萬二千四百八十有八去其卦數以命歲餘故歲日相得象數不整為萬歲麻行之五十三萬一千四百四十一歲七精還始與天無弊是第一首義前所立非諸述讓之所經說疑義有九開端十二作十二開別繫于後

慮圖中

日行進退見于表晷表晷贏縮圖律所出法置天方四周各百二十有八方圓相削凡十八變而反于極兩極出地表當天中一表之中僅當一方方各有八與卦相直八九相除以視贏縮九以為法八以為晷晷影之端別日月食陽圖交盡一尺四寸八分陰圖交盡一丈六尺一寸二分以倍命日八九除之或終或中皆律其食為百二十以聽其律陽以九九陰以六六盈縮於三為百十七歲十二辰以三命之三乘全律兩命其率而象數不失是第二首義前所立非諸述讓之所經說亦十二開別繫于後

慮圖下

天日競旋地牽其中九道遲差若雌與雄鎮歲癸日金水月地在于天下輕重相次月遲以日地遲以月大小度分各喻十三地之從天一月所牽強贏十三凡歲地行一百五十六分二十五秒周卦之歲而進一度以歲乘卦而得度周以餘乘歲而得周度大地之分當天十一故十一乘而精物可畢以四因之而無餘圖故百有二萬八千五百四十四歲為四十五會而差合不闕是第三首義前所立非諸述讓之所經說亦十二開別繫于後

文圖序

文圖上

姬文上聖始變卦次序六十四為七十二爻立八表九次相起揆象定表吹律命位每卦十八或贏或乏三分損益逾九而越或從其陽或從其陰大地所治當日月心一萬三千一百四十九里而聖人不事赤道準極各三十六赤極相距各五十五日月上下卯酉子午視其星繫以為卦土泛而視之為六十四屯蒙需訟不知其數揆象吹律迺知其故是第四首至文始立非諸述讓之所經說亦十二開別繫于後

文圖中

人得地息準于日度陰陽既合每倍其數一六四六息與動俱臟腑十二與圖書相副天泉兩間五歲間遷戊己當乾以司地泉歲星之行亦左右臨象數相交直于其陰倍七十三歲而屯需師畜左右間尋日星相交如顧兩手循股至附以復于肘是第五首至文始立非諸述讓之所經說亦十二開別繫于後

文圖下

七十二卦以五乘之為乾坤策日月晝夜以別冬夏損益歲餘復反其初日臨月觀天地復還開物當名不違其端八際月交三百四十有八又踰其一以會日月日月之行則有贏縮地亦因之以遲以速非地亦有遲速日月高下以離其服圖書相交五十之中以乘四方總除其央再乘十九上下象數以為大章大章之月與辰相直去八十一為日月式是第六首至文始立非諸述讓之所經說亦十二開別繫于後

孔圖上

仲尼妙言始命卦位萬物終始視日所在五精從之各依其方以其本數察五精度良藏其已坤藏其戊震

孔圖中

有木火兌有金水三五十五以復其數性有所著命有所屬情有所有好亦有所惡好惡以貞性命迺固視日所在以正其度以正父子君臣賓主兄弟夫婦是第七首至孔始立姬文首乾仲尼首震乾以立性震以立命知性命迺立知性命迺盡見在繫傳非諸述讓之所經說亦十二開別繫于後

孔圖下

天上地下頂踵迺立陰陽腹背左右互易乾坤之等七十有二以八乘之五百七十有六每卦之分一十有八積三十二而究于本末三部九候以眠生脫八表之交在于中達謹守孚過勿使氣奪陰陽太少平于渙節其上二百九十有七其下二百七十有九日月兩交互于濟中乾坤以通踵動于咸恒氣發于屯蒙目亢還潛不戰焉窮是第八首至孔始立非諸述讓之所經說亦十二開別繫于後

貞圖序

歸藏首坤連山首艮何以首艮兩乙之命仲尼函三兼兌與震震委兌源山澤以蟠方于兩臂一尺千里八表徑圍為八尺水中街兩交達於四末左陽右陰任督上下七百二十九穴萬物有命皆繫房中大火見陽列國迺從木落水歸安知西東故已不破亥未不破癸河漢縱橫為百國累不識八累何言八會不測八表何言天老人從地之為天地從天之為道是第九首至孔始立非諸述讓之所經說亦為十二開別繫于後

雜圖序

古聖知作雜圖始出雜圖若呂貞圖若律春秋之元在貞雜端距古甲子太陰之圖四千三百七十四歲太

陽之行五千三百四十六九六始戰爲災歲會乘陽就陰退行九百七十二歲太陽之極八十有一乘之以六四百八十有六又倍退之而反于圖始少陽之極二百四十有三乘之以兩四百八十有六又半進之而及于災歲故爲災限四千六百一十有七知無繆言聖無妄作反復其道以辨憂樂往九則來七往六則來八往一則來三往四則來二往二則來四往三則來一往五則來十象八數九往來相直推之百世不失其一是第十首亦爲孔設非諸述讓之所經說亦十二開別繫于後

雜圖中

爲象紀歲紀歲以明運爲數紀日紀日以著月月行十三月交二十有七大餘并五小并十九故爲十九以當章二十七章以當際八際以周卦周卦而去八月會平行四十有七以會經食六千三百四十五會上下一百三十五食餘分之積以交數爲實八乘食法而四分歲之一以歲四分一千八十餘十有二而加其一象數終會春秋用之以紀日食是第十一首至孔始立非諸述讓之所經說亦十二開別繫于後

雜圖下

三易之道本于天地決以人事有易有詩有春秋春秋紀日詩以紀月日紀以軌月紀以部軌有三交其歲八十有一部有四章其歲七十有四六章之始以別日至五分月候以立五際故易二百九十六歲而終易之軌三百一十四歲而與天始會三垣九野經辰之四以爲詩緯故詩易春秋同次天地以治兩緯是第十二首至孔始立非諸述讓之所經說亦十二開別繫于後

餘圖序

總圖象歲餘圖象閏即孔圖位別爲十六精魂交變乾坤迺配一爻之分各九千五百有八餘分五五定于

地道不爲歲積六十四歲而度移一直日月相追近一遠三五震八風申令其間常事一行與卦往還行道而行之爲德無道而行之爲賊知道者不言知言者不惑是第十三首疑義有九開端十二亦爲孔設非諸述讓之所經說亦十二開凡百五十六開別繫于後

孝經大傳序

洪思曰子爲經筵講官請易詩書禮二十篇爲太子講讀未及孝經已念是經爲六經之本今此經不講遺使人心至此楊嗣昌陳新甲皆爭奪情而起無父無君之言滿天下大可憂乃退述是經以補講筵之闕

臣觀孝經者道德之淵源治化之綱領也六經之本皆出孝經而小戴禮記四十有九篇大戴禮記三十有六篇儀禮十有七篇皆爲孝經疏義蓋當時師儒商參之徒習觀夫子之行事誦其遺言尊聞行知萃爲禮論而其至安所在備于孝經觀戴記所稱君子之教也及送終時思之類多釋孝經者蓋孝爲教本禮所由生語孝必本敬本敬則禮從此起非必禮論初爲孝經之大傳也臣釋孝經微義有五著義十二微義五者因性明教一也追文反質二也貴道德而賤兵刑三也定辟異端四也韋布而享祀五也此五者皆先聖所未著而夫子獨著之其文甚微十二著者郊廟明堂釋奠齒冑養老耕籍冠昏朝聘喪祭鄉飲酒是也著者十七者以治天下選士不與焉而士出其中矣天下休明聖主尊經循是而行之五帝三王之治猶可以復也臣道周冒昧謹輯上言

詩表序

洪思曰少作也時方弱冠與春秋軌同作先子云梁山門人如劉完公陳平人曾受是經謂其體大思精皆與三易表裏今春秋軌亡是經圖存其序言而十二部與三十六表之義例猶或可尋也然

尚逸小雅類并以下表一序與終卷七表之序俱亡矣七表者一曰書春秋逸詩紀年準詩中卿士侯伯異姓表三曰風中準伯詳表四曰雅中卿士侯伯同姓表二曰書春秋逸詩紀年準詩中卿士侯伯異姓表三曰風中準伯詳表四曰雅中卿士列國賦詩去詩遠近表凡黃子所為詩序正春秋表正猶未脫草以授弟子詩表詩授春秋執春秋授滄上未有采本一遺巨亂難復存矣少從先子獲聞其略云

詩表蓋十有二部為三十有六表有篇序無章句訓詁以經分部以傳分表以表繫載表始於文武以迄春秋為三經之首列國世紀各以其公從於本序載始於仲尼左氏以迄西漢碩儒之所論述各以其辭從於本篇於是有序而後有序序以知詩之意有序而後有表表以知詩之時有表而後有載載以廣詩之義序有大小子夏毛公衛卿不以人別但併本序本序者本始也表有先後二南十三風二雅三頌年數不一遠近各異故有定表定表者揆世也載有詳略左氏荀卿呂客戴德戴聖韓嬰賈生董生孔鮒劉向此十君十二書者故最為多洪思曰載有有孝經引詩十條家語引詩五條左氏百六十有七條荀卿六十條呂客二九條向三十條言十二書者或謂章句成蔡義王吉蕭望之匡衡翼奉時見奏記故最為少洪思曰載祇西左氏過兼外傳劉向之兼新序也十餘條東漢載止於西京懼太衍也西京備載未見轅公故闕齊而存魯魯者申公也存之者存疑也韓見皆不入載其外而闕其內外以從載不得從序故申有表而韓無表也馬融忠經不以入載尊孝經也鄭國無所取者謂其詰也蔡邕無所取者謂其難也取於前漢前秦以為表載故其義廣而近古取於申公之說以為參表參序故知詩不孤據攷其編次而子夏為信取於卜序毛傳申說以為定表卜序十五國風皆有諸公則厥俱可推中有疎遠世譜不存若邱首頃公魏檜不錄史牒所缺則年次混矣然於二國中降魏從檜則為滅國參以世表國語竹書魏有武公之薨年獻公之滅歲檜有多父克鄆之年及武公寄帑之歲則皆本共思

和始末可推獨二南二雅無庸置表南始文王之中雅終幽王之末立法既定與詩同數則體更不移但祖春秋以裁雅例自文迄幽去其未集與成復辟二十四年自文迄厲合其出居共和行政一十六年皆為符揆尼父所取書傳燦然非可強附故鄭國以十月為厲表意不從而卜序以召口還幽君子所取遵古義思則意義不失表皆依舊無所反復惟魏從陳附四滅國為一更定而檜宜先魏曹宜先陳亦不輕易要以大象通其園微是知詩易造化所作仲尼天體卜商著告卜之與左或興或廢亦以園秘時為詬厲然仲尼亦以二氏為形管未與之一贊也故詩三百一十一篇亡詩者六增損其一則為天暇故以魯當二南三衛以秦當王鄭三伯以小白當四滅國幽風以文王至厲以周公至幽當春秋之實困而仲尼之大法已備子曰文王既沒文不在茲乎天之未喪斯文也後死者猶得與於斯文也故略舉部次作三十有六表繫於後

周南召南邶風鄘風衛風部第一

乾之動也止而初巽巽女也姤也其風南也風動于南萬物以成聖人不柔其家則不可以教人周室之大也其三世皆有聖女焉故其子姓多賢以順以貞康叔者武王之愛子也其為孟侯而以三誥也猶不足以新商之民則夫婦之道難也故始以二南嗣以三衛言周之難繼而商之難變也衛室之亂則皆始於內人焉子曰人而不為周南召南其猶正牆面而立也其邶鄘衛之謂乎作第一部序

周南關雎至麟之趾表序

周公從文與文俱始約以從文周甲一紀文德以天厥紀五十園枵之次星日以起春秋上元歲在鶉火其先戊寅四十二紀德被西土鳳集於所其先一甲蜚龍滿野乃其後載武王以生是以文王四十生發關雎之始則辨於此後世誦之以被於詩雅樂之亂周公所製周公攝政復有七年歲復在南萬世治焉作周南

表第一

召南鵲巢至騶虞表序

召公從武與武俱始約以從武周甲一紀武王以生壽六十四召公相之以歷成康周甲一紀成王元年召總百官又廿四年而後乃薨於是召德以匹於且不斥二國作召南表第二

邶風柏舟至二子乘舟表序
康叔懿親以釐殷墟周召而降此為孟長百八十年孝夷始衰頃侯有邶蓋八世孫而又八世至於惠公詩十九篇皆做柏舟棄德以色及其衰也賢人愁憂君淫以荒故去靜女而錄良子七公之間百有八十是為頃邶作邶風表第三

邶風柏舟至載馳表序
厲王又衰厲侯有邶沫土復淫共姜鳴貞至於七世為狄所入定中載馳而伯者出襲頃之年至於懿王二百四十備天之紀以為世警是曰釐邶作邶風表第四

衛風淇澳至木瓜表序
凡衛三世以為三風邶邶之淫二南首絕宣王既興武公入輔爰作淇澳不愧康德至於文公衛不得絕雖曰霸勳亦康武故七公之間襲釐與頃二百四十備天之紀以示復治是曰武衛作衛風表第五

王風鄭風齊風唐風秦風部第二
夫婦之道衰則男女之倫數則兄弟之變作震長男也而出於東方武王以治幽王以亂周室之東也則兄弟之既多焉鄭從王者也齊唐秦三者皆伯也王衰而伯出伯出而王迹熄夫其為

風也亦皆有兄弟之亂焉而秦獨無有者秦其夏聲乎能夏必大是季札子之言也其在齊晉之間也作第二部序

王風黍離至丘中有麻表序

文王之盛則三百年而天道遷平王之東八十五年而齊桓出國風止桓王風終莊桓為伯始莊為王終王風三王而天下窮禮樂之衰離黍丘中思彼二南其去遠矣作王風表第六

鄭風緇衣至溱洧表序
衛武匡宣鄭武匡平鄭召衛周其義則均緇衣之前爰有桓公相幽八年以亡於戎武公之後載歷五世鄭棄其師百十一年槩桓與武百有二十兩衛之紀而得其一西衛東鄭參兩示極皆最後亡與伯銷息作鄭風表第七

齊風鷄鳴至猗嗟表序
二南已熄鄭衛且替王子世衰異姓將繼齊為太師首立伯基東遷之前王室未夷實烹哀公紀侯譖之襄公復讎九世不疑其行則均見之於詩百八十年哀襄同譖作齊風表第八

唐風蟋蟀至采芣表序
齊始倡伯唐則繼之唐十三君釐侯獻公齊桓始盟詭諸不同蟋蟀采芣詩十二篇皆有隱憂共和以後伐魏以前百八十年兄弟相殘不錄文公各半其年以正於齊猶為從王事則從晉名則從唐成王所親始遷焉依嗣鄭與齊與秦相麗作唐風表第九

秦風車鄰至權輿表序

厲王之時十有二年乃命秦仲車轡所始凡十二公至於秦營二百四十獨叶符律爲二百宗衛以三世始得其數而武歷文亦百九十九凡齊與唐皆百八十又復倍之而國以亡秦獨倍之而國以興然而秦仲嬴姓以絕此四國者以王爲旒久而將捐鄭亦孱然作秦風表第十

魏風陳風檜風曹風幽風部第三

夫婦兄弟之道衰則大國先亂小國先滅小國滅則大國杰伯主強梁而周公將絕魏之始亡也在檜之後鄭從鄭而魏從唐唐鄭是依檜與魏滅夫檜魏者豈周公所以賞勳乎周公起則楚不得滅陳宋不得滅曹楚滅陳而宋滅曹是周公之所大戚也仲尼者以伯主而與齊秦繼晉以唐而楚宋則四滅國之謂也幽處西北以爲天首周以此興秦以此帝周公之東也而仲尼以思故知三部十五國之風者其知天所以建地所以從人之所以興亡乎作第三部序

魏風葛屨至碩鼠表序

平王十三魏武始薨攸其初年斷自幽王譜雖不章其義足通百二十年與鄭相從更始其前共和之間魏芮則均爲百八十與晉爲一魏之與晉非若阝鄆齊於遷邢晉於滅魏二伯所分功罪兆焉晉之封魏百八十年而分晉國又百八十而秦始奪若符券然作魏風表第十一

陳風宛丘至澤陂表序

共和元年陳幽十四定王九年而楚滅之凡十三公自幽至靈則自宛丘以至株林凡得二百四十有二所謂滅國不以秦比元姬所適備爲三恪而楚滅之詩不錄楚而獨錄陳故曰哀陳所以滅楚反自始封亦得二百四十有一作陳風表第十二

檜風羔裘至匪風表序

檜在魏前而移陳後陳在曹前而次檜先檜不附鄭魏不附唐所以存檜以緩鄭罪所以先陳以沒楚功世譜不存以意約之考於周記當以幽齊上邈始封三百一十是爲詩麻作檜風表第十三

曹風蟋蟀至下泉表序

滅國之麻魏鄭不章或一二公其次不宜曹麻俱存僅取兩公四十五年昭公蟋蟀共公下泉伯者已衰晉虜宋滅晉文宋襄仲尼所非於其終曹義足見矣作曹風表第十四

幽風七月至狼跋表序

觀風詩者而至於幽則已止矣幽歷百世與周終始不可紀也成王初年周公徂征召公攝之三年乃復制禮作樂周召之志復見於斯已卯之年成王復辟與武元年又一周紀伯禽始封實啓我魯魯則周國幽則夏土三代之間蓋十二世永年多公以至文始而爲王者酌反於幽蓋亦八百始徵終衰千八百年天下之風於是閉開夏言連山殷備坤乾作幽風表第十五

小雅部第四

雅道之興也則必於文王焉宣王其猶庶幾乎西周之存也非宣王則亦何屬矣故文王之雅可以歌宣王之雅可以書夫文王者以天下之道治一國而猶以爲侯伯周公繼之乃取以治天下而澤及四海文王而有周公其至矣乎宣王者以一國之道治天下而猶惴惴乎恐不足也是亦西室之德也夫其未廣以大也作第四部序

小雅鹿鳴至杕杜表序

文王踐祚歲陽在戊其陰在寅歲星所居在於姬訾不在於丑厥五十年歲復其次而爲成王復子明辟文王之詩悉用典禮常棣之作則始於此作小雅表第十六

小雅魚麗至菁菁者莪表序

采薇之三猶爲殷紀魚麗而下周德茂矣魚麗九篇有六亡詩繼以蓼蕭四海誦德爲受命年其歲己未槩於周公致治之際皆與鹿鳴爲一周次作小雅表第十七

小雅六月至無羊表

宣王元年以至春秋一百有五其在上世成王初載迄於宣元二百四十而有三歲仲尼叶圖春秋爲治鳴鳥不聞西狩至矣故成至宣中間八王存康傷厲其六王者仲尼去之不錄其詩故爲宣紀其篇十四作小雅表第十八

小雅部第五

宣王往而周室衰其始衰也則雅且亂焉至於幽而甚也傳曰鹿鳴廢則和樂缺矣四牡廢則君臣缺矣皇皇者華廢則忠信缺矣常棣廢則兄弟缺矣伐木廢則朋友缺矣天保廢則福祿缺矣采薇廢則征伐缺矣出車廢則功力缺矣杕杜廢則師衆缺矣魚麗廢則法度缺矣南陔廢則孝友缺矣白華廢則廉恥缺矣華黍廢則蓄積缺矣由庚廢則陰陽失其道理矣南有嘉魚廢則賢者不安下不得其所矣崇丘廢則萬物失所矣南山有臺廢則爲國之基墜矣由儀廢則萬物失其道理矣蓼蕭廢則恩澤乖矣湛露廢則萬國離矣彤弓廢則諸夏衰矣菁菁者莪廢則無禮儀矣小雅盡廢則四夷交侵中國微矣此非毛衛之言則必卜子夏氏之言也夫猶不知於六月廢而勤王者無功也采芑廢而大臣不

任師旅也車攻吉日廢而天子召戎也鴻雁廢而人民流離家室爲空也污水庭燎廢而諸侯相戒不敢朝王也鶴鳴廢而告亂者猶以爲罪也祈父廢而民不欲生也白駒廢而賢者自危也黃鳥我行其野廢而夫婦離朋友相捐婚姻不云也斯干無羊廢而宗周不居人鮮以飽也故雅之始亂也吾於節南山而見鹿鳴焉諸篇之中則各有取之此十八者則其憂創也作第五部序

小雅節南山至雨無正表序

春秋三年二月己巳朔日有食其半在宣一百二十八年七月甲子之晦日食既之始於元年一百二十而有其二終於獲麟五月庚申朔日有食之仲尼所筆三十有六於其既日以爲食既故百二十以爲日記四萬三千八百三十去其九六以見交食拆而半之六十有一在於幽王二年十月辛卯之日由是而降周宗既滅故老傷昔或悼往者如其身遘天命殄絕於平王末四十有九而亂極矣作小雅表第十九

小雅小口至巷伯表序

小口之三婦口已煽巧言之三讒人方盛巧言之三君棄其臣小口之三父棄其子幽十一年取分於六先君後臣逆而視之而雅道盡作小雅表第二十

小雅谷風至鼓鐘表序

雅道已絕則二南不作朋友相離孝子缺賢人勞苦而小人得志聞樂而憂故其義也凡宣之年四十有五以幽承宣一十有二其所錄詩皆十有四其節南山通於平末獨得四詩而爲一紀此其大者君臣父子兄弟朋友仁人賢士廢爲殘賊小宛之篇追刺宣王不善訓子鼓鐘之篇遠懷文武南雅爲治念此二人而楚茨起矣作小雅表第二十一

小雅部第六

夫亂之初生也則其人駭賢者憚而愚者離及其狎也則其人疲愚者憔悴而賢者思夫思者之言也而無以異於平時不知者則以為旨美也甚哉知言之難也春秋之詞據事而多斷詩之詞據事而多緩即不以其事也則必有以矣吾於楚茨而見魚麗焉諸篇之中亦各有取之也季札子曰美哉思而不貳怨而不言其周德之衰乎猶有先王之遺民也則楚茨諸篇之謂矣作第六部序

小雅楚茨至鴛鴦表序

幽王而降凡六十年邇亂傷周以幽為殃楚茨之四黍離同悲瞻洛之四諸侯不來自自此以下如節南山通六十年言之益緩而志益悲不皆幽世四十四詩作小雅表第二十二

小雅頌弁至苑柳表序

洪尊光曰詩表與詩揆可五十卷是子夙年杜門時書時浦中來學者唯陳士奇陳瓊者有之然二陳有書成不樂傳何也後南陳仕於蜀西陳仕於楚俱以陷賊殉節而死不復歸書遂亡世變後劉完公已避地海外不復出始以詩表五十序寄余山中

小雅都人士至何艸不黃表序

其後十篇聲氣益健白華而上作於周人綿蠻而下作於下國白華之詩八年棄后漸石之作六年伐戎孤據為難通於平世繹其况韻亦足傷也得附前篇作小雅表第二十四

大雅部第七

雅而大則至矣文王沒而武王克商文王受命而武王繼之又以為后稷公劉太王王季之所致也則

周公至矣哉周公召公者天之所以翼周也以南以雅則必有一公焉鳴鳥可聞周公之所以勸召也故自文王而卷阿見天命之篤而禮樂之至焉作第七部序

大雅文王至旱麓表序

武乙元祀邪遷於岐二十一年夏父以卒文丁四載季歷作牧其又八年九命作伯塞庫之難鬱尼為傷歲在丁丑義與殷絕文王嗣之不失殷則四十二年戊午部二十有九季秋甲子銜丹入戶明年改元仲尼祖之下逮周紀八百四十四上邇后稷邇近恍惚前智所說不可蹟也武王嗣之但有四載不與文等三載伐商一年致治周公攝政則亦有七周二鵲火而大雅備周南小雅俱見其紀而邇世德文王作周武王繼命綿本太王早麓受祖則於此焉作大雅表第二十五

大雅下武至文王有聲表序

周禘太王則以姜女爰及王季而有任氏三后在天天妹云多思齊之篇嗣以皇矣文王九年代密伐崇載伐昆夷自程遷豐世子營鎬大功以集爰作靈臺以及辟雍故此五篇皆九年中作大雅表第二十六

大雅生民至卷阿表序

后稷之世其次莫紀公劉文王為十二世小康初年稷復其官迨至公劉其次九百上自后稷一千八十春秋之符史稗莫測周以乾坤實長內德姜嫄以前祖始黃帝亦千八十公劉之世終以成王九百六十周室之祥則有行葦言之若缺不失其節既醉曷鷺周公之澤河酌卷阿召公之德周召二公四世承烈雅莫大焉作大雅表第二十七

大雅部第八

民勞而後則已矣夫天命其猶未絕焉大雅之詩亦未盡廢也吾於板蕩而見文王焉於抑而見卷阿焉於桑柔而見公劉焉故民勞之五篇大矣哉夫子之所取也作第八部序

大雅民勞板表序

大雅終屬天命未絕春秋約券益以文載四十有二以爲詩紀方之小雅揆無二致小雅之篇則爲大夫及其士庶歎惜憂慮大雅之篇卿士侯伯起而救之故有共和不爲亂德春秋兆茲而統不裂故爲詩紀以過三百幽哉微哉仲尼所測作大雅表第二十八

大雅蕩抑表序

召公之勳嗣周爲多正則周長變則召烈穆公匡厲實與凡伯不維凡伯又長衛武皆佑宣王以保西土作大雅表二十九大雅桑柔表序

維姬懿親穆公武公凡伯芮伯去古未遠皆有賢德維此五篇姬姓四伯衛其有厥詩有滅魏春秋滅蔣芮凡託雅乃以不滅五篇三表而非爲過作大雅表第三十

大雅部第九

天命未絕故屬沒而宣出宣出而克復彼其將相卿佐侯伯則猶之周召之後也天命將絕則宣沒而幽出幽出而大雅之道盡小雅之道滅幸哉文德之固也世無文王而姓猶姬氏也君子以爲周召不出之故也於是起而哀之哀之而曰不尙有舊則是天下之不忘文王也夫天下不忘文王則大雅之道尤有存焉仲尼之於小雅也傷幽於大雅也傷厲而終以瞻印召口二篇夫亦深矣哉作第九部序大雅雲漢至韓奕表序

宣王歷載四十有五卿士內正侯伯外順故有仍叔及尹吉甫修禮飭樂分賚侯國申伯甫侯樊侯韓侯皆歷平世不得其紀約百二十年始於共和春秋繫之作大雅表第三十一

大雅江漢常武表序

蓋五六年實與南師召公伐淮王親征徐則有皇父爰及程伯皇父繼世程爲周士實本召公王蹟猶故作大雅表三十二

大雅瞻印召口表序

幽承其一爲十二載王澤竭矣瞻印召口皆凡伯作周公之裔而思召公雅道猶存其何以亡凡大雅變亦有九國卿尹者五列於三公足齒述焉其二亂曰藐藐昊天無不克鞫維今之人不尙有舊凡伯之言周公不死再益其麻踰九六紀此之謂矣作大雅表三十三

周頌部第十

夫詩則亦逆數也有頌而後有大雅焉有大而後有小焉有雅大小而後風出焉風則易焉雅則禮也頌則樂也夫亦皆有易禮樂焉風其始動者也雅其正奏者也頌其功成者也其始治也則風先告而頌後作其始亂也則頌先缺而風後變周樂之作也而皆終之以關雎故三百者仲尼所以考厥也三十一者文王所以命世也三百九十有一者西土所以建邦也六者周公所以攝政也四者魯所以得一也五者商之除故也九者乾之所以極物也百二十者參之所以成化也百有八十者兩之所以分用也聖人之旨知而不可言言而不可固一作而不可再作行之者聖通之者明由而不知者衆人知而不默者亂民愚哉吾之言也作第十部序

周頌清廟至般表序

成王初載壬申之歲周公攝政周有天下已當大禘周公王祀爰立清廟禮樂伊始其又五年諸侯來助後此二歲戊寅之年文以此紀爰作周室乃以二月乙亥之朔庚寅望後六月乙未王至于豐越若三月甲辰之朔三日丙午五日戊申召公至洛七日築考十有一日甲寅位成翌日乙卯周公朝至廿有一日甲子用命殷庶邦伯是歲將盡十有二月戊辰晦日王在新邑周公致政明年復辟己卯之歲己巳朔日又當卜祀後三十年四月庚戌朔越十五甲子生霸乃作顧命康王繼之召公未沒載粵刑措四十五載頌聲之衍於斯極焉作周頌表第三十四

魯頌部第十一

頌至於魯則已矣春秋之後矣夫魯作頌而秦作誓秦以終書魯以終詩天命之在仲尼則又何疑焉仲尼者據易者也圖錄者春秋也小白者分詩之半分書之半春秋之伯也此不得國者也詩王也書帝也頌者王之正誓者帝之亂也魯之誓不得終也公之始也秦之風不得終也伯之始也春秋者天符也魯姬甲秦任好春秋之兩曜也齊小白者仲尼之庶長子也春秋之策八萬七千八百四十魯姬甲秦任好皆得二萬三千三百六十故春秋一周而秦受命秦已肇於書春秋一周而魯受命魯已肇於詩詩書者仲尼之錫命也小白之策萬有一千五百二十故受命於春秋春秋者小白之所食也魯秦之受命也則皆於正月之上日去其三百有二十焉故春秋之周二萬三千四十者魯頌之元統也仲尼之所治也天下後世則有疑吾言者焉吾乃以默於天符作第十一部序

魯頌廟至閔宮表序

成王大封厥後三十伯禽之祿四六十歲盡于惠公治祿之家逸一章閔在康王時放其文始三百四十義見於部作魯頌表第三十五

商頌部第十二

周命既衰而殷肆又長宋茲父之策二萬二千一百四十春秋以命其別族尙文者世尙忠者弟春秋之上元十二萬九千二百以用其禮樂周則有魯春秋則有宋頌之有商春秋之禘祀也詩曰皇皇后帝皇祖后稷其商頌之謂與作第十二部序

商頌那至般武表序

商世遠矣二十九王僅得三宗享國一百六十有七蓋自武丁以下九主當在文丁周室之興百有五十又七十四而殷用減約殷從月約周從歲六百之祀武丁九主春秋之符亦復具焉作商頌表第三十六凡以本序作爲定表非以己意酌約毛申毛公之意時爲本序有所不及未之能勝而申氏說其所差池或百十年與本序不同至大懸絕則不得取以爲斷今所定表惟本卜氏而於申表附於其後如衛三風卜序皆始於衛頌釐武公柏舟淇澳終於齊桓之世有狐木瓜二百四十二年而申以邶鄘爲管叔時詩篇次不同無得而紀至於衛風十有六公亦始於釐侯柏舟而終於靈公婦嬖三百六十年之間以意附合殊違微旨蓋亦略近聲響而迷其鐘鏞也舉此二端足定全表又卷有定篇篇有定序要以先後微酌其次如邶風雄雉原則宣公或別有指如以爲軍旅數起則莫如惠公三十年間用師十五當爲甚耳本序自匏葉而下不指宣公則時者多惟新臺柏舟爲宣公詩以括上篇則谷風八詩不皆宣世故出新意以谷風式微鹿丘泉水定爲宣公而終以新臺以簡兮北門靜女北風定爲惠公而終以乘舟雖在惠世

得刺宣公足暢序義未爲礙也又如邶風載馳宜在定中之上而居千旄之下衛風河廣宜在文公之世宋襄公卽位而在惠公之時世次不同而皆不甚遠或措置微誤何妨顛末若鄭風清人應在文公十三年冬何緣得附太叔之後而揚之水閔忽無臣應與襄裳相次不得在子衿東門之間明爲毛公失次非卜氏差池其不指稱公者餘有公則係其前無公則係其後于理可推若唐風椒聊爲刺昭侯而綱繆杜羔裘鶴羽則宜在孝鄂四世侯緡之間至其風氣不殊世次致異雖在前賢時史所錄或小差者如秦十二世春秋以前盟會亦少至後而備可以今世詳其譜牒故秦仲始命而有車鄰莊公厲兵志在雪憤而有無衣襄公始有西服祠帝西時而有終南文公游獵觀於汧渭而有鐵駟武公始伐邽冀兼有岐東而有小戎德公徙居于雍下臨二水豐鎬魏矣而有蒹葭穆公造晉康公送之而有渭陽於是晨風權輿共爲康公終以黃鳥斷於秦穆是亦至義非臆說也定表之義風爲最多雅惟十月爲厲今昔所疑然其文自爲幽又雅篇宏重不致出入毛公篇次誤致者少及年厯易辨先後如一矣周頌所據僅止周公成王而上三十年間禮樂之次亦爲易明作洛之年受命十載大修禘祀先立文廟而次武廟周書七年立高圉廟爲七廟也則於穆維天維清已奏舞象當遂合樂禘于太廟先王先公而天作潛雖有瞽繼之執競祀武作頌六篇則武賚酌般桓此五篇當與執競爲一故楚子曰武王作武其卒章曰耆定爾功其三曰敷時繹思我祖維求定其六曰綏萬邦屢豐年五篇以合執競爲六也由是諸侯助祭則烈文振鷺有客載見以次相從其明年崇祀明堂又明年爲受命十三年柴告四望巡狩五嶽而昊天我將思文時邁以次奏矣于是反告文廟奏文之頌告武廟奏武而禮樂大備其臣工至絲衣六詩春秋之祀閔予四詩成孝思詩以此求之得其義矣故易有序易而詩無序詩卜序不訛而後儒多誤于是作爲定表又爲序

詩序詩雜篇準易而起而仲尼子夏所受定焉



